



09886

元史卷四十五

列傳二十九

至正討賊諸臣

秦不華

石抹宜孫

邁里古思



秦不華字兼善伯牙吾台氏初名達普化文宗賜以今名世居白野山父塔不台入直宿衛歷仕台州錄事判官遂居於台家貧好讀書能記問集賢待制周仁榮養而教之年十七舉江浙鄉試第一明年對策大廷賜進士及第授集賢修撰轉祕書監著作郎拜江南行臺監察御史時御史大夫脫歡怙勢貪暴秦不華劾罷之文宗建奎章閣學士院擢爲典籤拜中臺監察御史順帝卽位加文宗后太皇太后之號大臣燕帖木爾柏顏皆裂土封王秦不華率同列上章言叔母不宜加徽稱相臣不當受王封奏上太

元史卷四十五 列傳

一

后怒欲殺言者秦不華語眾曰此事自我發之甘受誅戮決不以累諸公也已而太后怒解曰風憲有臣如此豈不能守祖宗之法乎賜金幣二以旌其直至正元年除紹興路總管革吏敝除沒官牛租令民自實田以均賦役行鄉飲酒禮教民興讓越俗大化召入史館與修遼金宋三史書成授祕書監晉禮部尙書黃河決奉詔以珪玉白馬祭河神竣事上言淮安以東河入海處宜做宋置撩清夫用輓江龍鐵掃撼蕩沙泥隨潮入海朝廷從其言會用夫屯田其事中廢八年台州黃巖民方國珍入海爲亂劫掠漕運執海道千戶事聞詔江浙參政多爾只班總舟師捕之追至福州五虎門國珍知事危焚舟將遁官軍自相驚潰多爾只班遂被執國珍迫令上招降之狀朝廷從之國珍

兄弟皆授以官勢益暴橫九年詔秦不華察實以聞既得其狀遂上招捕之策不聽尋除江東廉訪使已而出爲都水庸田使十年十二月國珍復入海燒掠沿海州郡十一年二月詔孛羅帖木爾爲江浙行省左丞總兵至慶元以秦不華諭知賊情遷浙東道宣慰使都元帥分兵溫州夾攻之未幾國珍寇溫秦不華縱火筏焚之一夕遁去旣而密與孛羅約以六月乙未合兵進討孛羅乃以壬辰先期至大閩洋國珍夜率勁卒縱火鼓譟官軍不戰皆潰赴水死者過半孛羅被執反爲國珍飾辭上聞秦不華聞之痛憤輟食數日朝廷弗之知復遣大司農達識等至黃巖招之國珍兄弟皆登岸羅拜退止民間小樓是夕中秋月明秦不華欲命壯士襲殺之密白其事達識曰我受詔招降

元史卷四十五 列傳

二

耳公欲擅命邪乃止達識復檄秦不華親至海濱散其徒眾拘其海舟兵器國珍兄弟仍授官有差旣而遷秦不華台州路達魯花赤十二年朝廷征徐州命江浙省臣募舟師守大江國珍懷疑復入海以叛秦不華自分以死報國發兵扼黃巖之澄江而遣義士王大用抵國珍示約信使之來歸國珍益疑拘大用不遣以小舸二百突海門入洲港犯馬鞍諸山秦不華語眾曰吾以書生登顯要誠慮負所學今守海隅賊甫招來又復爲變君輩助我擊之若克則汝眾功也不克則我盡死以報國耳眾皆踴躍願行時國珍戚黨陳仲達往來計議陳其可降狀秦不華率部眾張受降旗乘潮而前船觸沙不能行垂與國珍遇呼仲達申前議仲達目動氣索秦不華覺其心異手斬之卽前搏

賊船射死五人賊躍入船復斫死二人賊舉槩來刺輒斫折之賊羣至欲抱持過國珍船秦不華矚目叱之脫起奪賊刀又殺二人賊攢槩刺之中頸死猶植立不仆投其屍海中年四十九時十二年三月庚子也僮名抱琴及臨海尉李輔德千戶赤蓋義士張君璧皆死之追贈江浙行省平章政事封魏國公諡忠介立廟台州賜額崇節秦不華博通經史兼善篆隸溫潤適勁嘗重類復古編十卷攷正譌字於經史多有裨益云

石抹宜孫字申之其先遼之迪烈兀人五世祖耶先事太祖爲御史大夫見平金功臣傳耶先之曾孫曰繼祖爲沿海上海上副萬戶初以沿海軍分鎮台州皇慶元年又移鎮婺處兩州馭軍嚴肅平寧都寇有戰功且明達政事宜孫其

元史卷四十五 列傳

三

子也嗜學博覽長於詩歌常借嫡弟厚孫廢襲又職爲沿海上海上副萬戶守處州及弟長卽讓還其職退居台州至正十一年方國珍起海上江浙行省檄宜孫守溫州其年閩寇犯處州復檄宜孫以兵平之以功授浙東宣慰副使分府台州處屬山寇竝起宜孫復奉省檄往討築城禦敵十七年江浙行省左丞相達識承制授宜孫行樞密院判官總制處州分院治于處又以江浙儒學副提舉劉基爲分院經歷蕭山縣尹蘇友龍爲照磨而宜孫又辟郡人胡深葉琛章溫參謀軍事處爲郡山谷聯絡盜賊憑據險阻輒竊發不易平治宜孫用基等謀或擣以兵或誘以計未幾皆殲殄無遺尋同僉行樞密院事時天下多故所在守將各自爲計相保守於是浙東則宜孫在處州邁里古思在

紹興竝能扞衛一方十八年十二月明兵取蘭谿且逼婺  
宣孫母時在婺卽遣胡深等將民兵數萬赴援親率精銳  
爲之殿比至婺與明兵甫接卽改績時經略使李國鳳至  
浙東承制拜宣孫江浙行省參政明年明兵入處州宣孫  
將數十騎走福建境欲圖報復而人心已散事不可爲嘆  
曰處州吾所守也不如還處州死旣還至處之慶元縣爲  
亂兵所害事聞贈越國公諡忠愍其幕下劉基章濂葉琛  
等後竝仕明爲名臣

邁里古思者寧夏人也字善卿至正十四年進士授紹興  
路錄事司達魯花赤苗軍主將楊完者在杭縱部下抄掠  
莫敢誰何民甚苦之俄有至紹興城中強奪人馬者邁里  
古思禽斬數人苗軍乃懼不敢復至名遂大振會江南行

元史卷四十五 列傳

四

臺移治紹興檄邁里古思爲行臺鎮撫乃大募民兵守禦  
俄處州山賊焚掠婺之永康東陽邁里古思提兵與石抹  
宣孫夾攻平之擢江東廉訪司經歷仍畱紹興以兵衛臺  
治時浙東西郡縣多殘破獨邁里古思保障紹興境內晏  
然會方國珍遣兵侵據紹興屬縣邁里古思先遣部將黃  
中取上虞中還將益兵是時朝廷方倚重國珍資其舟以  
運糧而御史大夫拜住哥與國珍素通賄賂情好甚厚憤  
邁里古思擅舉兵且恐生事卽使人召至其私第計事命  
左右以鐵鎚搗殺之斷其頭擲廁溷中城中民無不慟哭  
黃中乃率其眾復讐盡殺拜住哥家人及臺府官員掾史  
獨畱拜住哥不殺以告於張士誠士誠乃遣其將以兵守  
紹興拜住哥尋遷行宣政院使監察御史眞童糾言拜住

哥陰害帥臣幾至激變不法不忠莫斯爲甚宜寘嚴刑於是詔削拜住哥官職安置湖州而邁里古思之冤始白

### 李黼

李黼字子威潁人也工部尚書守中之子守中性卞急每飲酒醉輒怒詬諸子黼百計承順不可得跪而自訟往往達旦泰定四年以明經魁多士授翰林修撰拜監察御史首言禴祠烝嘗古今大祭今太廟唯二祭而日享佛祠神御非禮也宜據經行之成均教化之基不當隸集賢宜屬省臣兼領諸侯王歲賜有定額分封易代之際陳請恩例世系戚疏無成書可攷宜仿先代修正玉牒皆不報遷宣文閣監書博士兼經筵官數以王道勸講俄中書命黼巡視河渠黼上言曰蔡河源出京西宋以轉輸之故平地作

### 元史卷四十五 列傳

五

堤今河底湮淤高出地面秋霖一至橫潰爲災宜按故迹修浚他日東河或有不測之阻江淮運物當由此分道達京萬世之利也亦不報授江州路總管至正十一年夏五月盜起河南北據徐蔡南陷蘄黃焚掠數千里造船江北岸銳意南攻九江居下流實江東西襟喉黼治城濠修器械募丁壯分守要害且上攻守之策於江西行省請兵屯江北以扼賊衝庶幾大江之險賊不得共之不報十二年正月己未賊帥鄒普勝渡江陷武昌威順王及省臣相繼遁舳艫蔽江而下江西大震賊乘勝破瑞昌右丞孛羅帖木爾復遁黼愈孤立時黃梅縣主簿耶孫帖木爾願出擊賊黼大喜瀝酒誓天賊遊兵已至境急檄諸鄉落聚木石於險塞處遏賊歸路倉卒無識號乃墨士卒面統之出戰

黼身先士卒大呼陷陳耶孫繼進賊大敗黼曰賊不利於陸必由水道以舟薄我苟失備禦吾屬無噍類矣乃以長木數千冒鐵椎於杪暗植沿岸水中逆刺賊舟謂之七星椿會西南風急賊果揚帆順流鼓譟而至舟遇椿不得動進退無措黼率將士奮擊發火翎箭射之焚溺死者無算餘舟散走行省上黼功請拜江西行省參政行江州南康等路軍民都總管便立行事已而賊勢更熾西自荆湖東際淮甸守臣往往棄城遁黼守孤城提屨旅旅斬馘扶傷無日不戰中外援絕二月甲申賊將薄城分省平章圖堅不花自北門遁黼引兵登陴布戰具賊已至甘棠湖焚西門乃張弩射之賊趨起未敢進轉攻東門而入黼與巷戰腹背受敵墮馬與從子秉昭俱罵賊死郡民聞黼死哭聲震

元史卷四十五 列傳

六

天相率葬之東門外黼死踰月參政命始下年五十有五黼兄冕居潁亦死於賊秉昭冕季子也事聞贈黼隴西郡公諡忠文詔立廟江州賜額崇烈官其子秉方集賢待制

星吉

納麟 卜顏鐵木爾

星吉字吉甫河西人曾祖朵吉祖朵爾只父朔思吉世事太祖憲宗世祖爲怯里馬赤星吉少給事仁宗潛邸以精敏稱至治中屢遷江南行臺御史大夫時承平日久內外方以優容爲政星吉獨持風裁御史行部必敕厲而遣之湖東僉事三寶住儒者也性廉介所至搏貪猾無所貸御史有以私請者拒不納則誣以事劾之章至星吉怒卽奏杖御史而白其誣執政者惡之移湖廣行省平章湖廣地連江北威順王歲嘗出獵病民又起廣樂園多萃名倡巨

賈以綱大利有司莫敢忤星吉至謁王王闔中門啟左扉召之入星吉引繩牀坐王中門西言曰吾受天子命來作牧非王私臣也焉得由不正之道入乎闔者懼入告王王命啟中門星吉入責王曰王帝室之懿古之所謂伯父叔父者也今德音不聞而騁獵宣淫賈怨於下恐非所以自貽多福也王急握星吉手謝之爲悉罷其所爲有胡僧曰小住持者服三品命服恃寵橫甚數以事轆轤官府星吉命掩捕之得妻妾女樂婦女十有八人獄具罪而籍之由是豪強斂手貧弱稱快蘄州羅田賊徐壽輝起據蘄水游氛日熾星吉會僚屬議之或曰有鄭萬戶老將也可用星吉乃命募土兵完城池修器械嚴巡警悉以其事屬鄭賊聞之遣其黨三千來約降星吉與鄭謀曰此詐也然降而

卻之無詞宐受而審之果得其詐乃殲之械其渠魁數十於獄以俟命適有旨召爲大司農平章和尙受賊賂且嫉其功乃誣鄭罪繫之而釋其在獄者明日賊帥鄒普勝以黨屬至內外響應城遂陷武昌之人駢首夜泣曰大夫不去吾屬豈爲俘乎星吉旣入見具陳致賊本末帝喜命賜食時宰脫脫以其語侵己弟耶先帖木爾前敗狀不悅奏爲江西行省平章員外置星吉至江東詔令守江州時江州已陷賊據池陽星吉開省太平官軍止三百賊號百萬眾皆欲走星吉曰畏賊而逃非勇也坐而待攻非智也汝等皆有妻子財物縱逃其可免乎乃貸富人錢募人爲兵先是行臺募兵人給百五十千無應者至是星吉募兵人五十千眾爭赴一日得三千人乃具舟楫直趨銅陵至魯

港威順王之兵亦至士氣益奮遂克銅陵又破賊白馬灣賊敗走分兵躡之抵白湄賊窮急回拒官軍乘勝擊之賊盡殪禽其渠魁周驢俘其眾五千奪船六百艘軍聲大振遂復池州賊走淮西乃部分諸將躡其後已而賊復擾池州貴池石埭諸縣遣兵收復追出境賊忽以舟師三百艘乘順流來攻命萬戶王惟恭列陳禦之鋒始交麾小艦從旁橫擊大破走之乘勝進望江清水灣三日偵報賊艦四百至上流順風舉帆眾且數倍諸將失色星吉日無傷也風勢盛彼倉卒必不得泊但伏橫港中偃旗以待俟遇而乘上風擊之必勝風怒水駛賊奄忽已過乃舉旗張帆鼓譟出其後賊驚駭官軍奮擊又大敗之獲戰艦甚眾時賊之圍安慶者聞敗燒營解去星吉且追且戰復湖口及

元史卷四十五 列傳

八

江州江州無一日糧乃命惟恭柵守小孤山而自據番陽口扼江湖要衝以圖恢復時湖廣江浙多衄江西亦無援應轉戰六月餘財粟殫匱士卒日困乏或請星吉就食東南以圖再舉星吉日吾受命守江西去此何之眾莫敢復言賊知星吉兵食俱竭帥大舶編葦蔽江而下截筏上下流縱火夾攻我軍力戰眾死且盡星吉之從子伯不華將親兵數十人死之星吉猶堅坐不動賊發矢射之乃昏仆賊素聞星吉名不忍害昇置密室中至旦乃蘇賊羅拜饋食星吉臥叱去遂不復食凡七日乃自力而起北面再拜曰臣力竭矣遂絕時至正十二年九月二十九日也年五十有七贈江西行中書省丞相封威寧王諡忠肅星吉公廉明決與將士同甘苦以忠義感激人心故能以少擊眾

得人死力與余闕皆以無援先後死東南事遂不可爲宋

濂碑其神道

見文憲集

納麟高智曜之孫睿之子也大德六年納麟以名臣子用丞相哈刺合孫薦入備宿衛延祐初拜監察御史以言事忤旨仁宗怒叵測中丞楊多爾只力救之乃解又言風憲持糾劾之權而受人賂者宜刑而加流累官至中書參政遷同知樞密院事授江浙河南行省平章至正四年入爲中書平章七年拜御史大夫所薦用御史必老成更事者八年請老不許加太尉御史劾罷之退居姑蘇十二年江淮盜起帝命爲南臺御史大夫納麟承詔卽起仍命兼大尉設僚屬總制江浙江西湖廣三省軍馬至則修築集慶城郭會江浙杭城失守淮南行省平章什列門引兵往援

元史卷四十五 列傳

九

次采石納麟使止之曰聞杭城易破不足憂今宣城危急宜先以兵救宣城乃調典瑞院使脫火赤率蒙古軍應之大破賊於埭下門宣城以安已而賊陷徽州廣德常州宜興溧水溧陽蔓延丹陽金壇句容略上元江寧游兵至鍾山集慶勢甚危納麟乃力疾治兵部署士卒命治書侍御史左蒼納失理守城中中丞伯家奴成東郊是時湖廣行省平章耶先帖木爾軍和州納麟遣使求援耶先帖木爾曰我奉命鎮江北不敢往援江東納麟仍遣監察御史鄭鄰力促其行耶先帖木爾引步騎度采石至臺城入候納麟疾納麟喜卽以其故聞於朝已而耶先帖木爾兵東趨秣陵殺賊二千餘人平湖熟鎮盡復上元江寧境乘勝入溧陽溧水賊潰奔廣德其據龍潭方山者奔常州時江浙

行省平章參旦巴右丞佛家閭亦引兵來會所在羣賊皆敗北州郡悉平十二年納麟固請謝事從之命守太尉如故乃退居慶元十六年詔以江南行臺移治紹興復命爲御史大夫十八年赴召由海道入朝至黑水洋阻風而還十九年復由海道趨直沽山東賊俞寶率戰艦斷糧道納麟命其子安安及同舟人拒之破其眾於海口八月抵京師帝遣使勞以上尊皇太子亦饋酒脯而納麟感疾日亟卒於通州年七十有九

卜顏鐵木爾字珍卿唐兀吾密氏性明銳倜儻早備宿衛歷事武宗仁宗英宗天厯初累擢江浙行省平章至正十二年春斬黃賊徐壽輝遣兵陷湖廣侵江東西詔卜顏鐵木爾率軍討之卜顏益募壯健爲兵得驍勇三千戰艦三

元史卷四十五 列傳

十

百時湖廣平章耶先帖木爾江西平章星吉江南行臺御史中丞蠻子海牙皆以兵駐太平逗畱不進卜顏至乃與俱前賊方聚丁家洲官軍猝與遇奮擊敗之遂復銅陵縣禽其賊帥復池州遂分遣萬戶普賢奴屯陽陵王建中屯白面渡閭兒討無爲州而自率鎮撫不花萬戶明安駐池口以防遏上流爲之節度已而江州再陷星吉死之蠻子海牙及威順王寬徹普化軍俱潰而東安慶被圍益急遣使求援諸將皆欲自守信地卜顏曰何言之不忠邪安慶與池止隔一水救患之義何容緩且上流官軍雖潰然皆百戰之餘所乏者錢穀器械耳吾受命總師其可視之而不恤哉卽大發帑藏以周之潰軍皆大集而兩軍之勢復振安慶之圍遂解十三年三月賊眾復來攻池州眾且十

萬諸縣皆應之。卜顏會諸將謀曰：賊表裏連結，若俟其壘成而坐食諸縣之粟，破之實難。今新至疲敝，乘其驕惰，盡銳攻之，卽頃刻間功可成矣。眾曰：諾。遂分番與戰，大敗之。禽其僞帥，俘斬無算。諸縣復平，遂乘勝率舟師以進。五月，與戰於望江，又戰小孤山及彭澤，又戰龍開河，皆破走之。進復江州，畱兵守之。七月，進兵攻蘄州，禽賊帥鄒普泰，遂克其城。進兵道士泐焚其柵，抵蘭溪口，及賊巢黃連砦，盡殲之分兵。平兩巴河，於是江路始通。十一月，與蠻子海牙、四川行省參政哈臨圖、左丞桑圖失里、西寧王牙罕沙軍合湖廣左丞伯顏不花等軍，皆會十二月分道進攻蘄水。縣拔僞都獲僞將相而下四百餘人，徐壽輝僅以身免。以功賜上尊黃金帶，時丞相脫脫方總戎南征，聞諸賊皆已

元史卷四十五

列傳

十一

破乃檄伯顏不花征淮東蠻子海牙，守裕溪口。威順王還武昌，而卜顏獨控長江。十六年六月，復以軍守池州。十一月，卒。卜顏持身廉介，人不敢干，以私其爲將，所過不受禮。遺宴犒民，不知有兵性。至孝幼養於叔父阿朮事之如親。父常乘花馬，時稱爲花馬平章。

荅什拔都魯

荅什拔都魯

舊作荅失八都魯

曾祖紐璘祖耶速荅，自有傳。荅什

南加台子也。

南一作囊附見倒刺沙傳

以世襲萬戶，鎮守羅羅宣慰司。

土人作亂，荅什捕獲有功。四川省舉充船橋萬戶，出征雲

南，遷大理宣慰司都元帥。至正十一年，特除四川行省參

政，撥本部探馬赤軍三千從平章交住討賊於荆襄。時交

住兵旣平江陵，荅什請自攻襄陽。十二年，進次荆門，賊十

萬官軍止三千餘用宋廷傑計招募襄陽官吏及土豪避兵者得義丁二萬編部伍申約束至蠻河賊守要害兵不得渡卽令屈萬戶率奇兵由間道出其後首尾夾攻賊大敗追至襄陽城南大戰生禽僞將三十人賊閉城不復出荅什乃相形勢內列八翼包絡襄城外置八營軍峴山楚山以截其援自將中軍四千據虎頭山以瞰城中署南漳宜城二縣尹拊循其民以賦軍饋城中民受圍日久夜半二人縋出叩營具告虛實願爲內應荅什與之約期攻城授以密號而去至期四更民垂繩以引官軍先登者近十人時賊船百餘艘在城北陰募善水者鑿其底天將明城破賊巷戰不勝走就船船壞皆溺死賊將王權領千騎西走遇伏兵被禽襄陽遂平賜號拔都魯以其弟識里木爲

元史卷四十五 列傳

十一

襄陽達魯花赤子孛羅帖木爾爲雲南行省理問比賊再犯荆門安陸沔陽荅什輒引兵敗之尋詔益兵五千以烏撒烏蒙元帥成都之花聽其調發十三年定青山荆門諸寨九月率兵略均房平穀城攻拔武當山寨數十二月趣攻峽州破木驢寨遷四川行省右丞十四年正月復峽州三月遷四川行省平章兼知樞密院事總荆襄諸軍五月命玉樞虎吐華代荅什守中興荆門令荅什以兵赴汝寧十月詔與太布花會軍討安豐是月復苗軍所據鄭鈞許三州十二月復河陰鞏縣十五年命荅什就管領太布花一應諸王藩將兵馬許以便宣行事六月拜河南行省平章進次許州長葛與劉福通野戰爲其所敗將士奔潰九月至中牟收散卒團結屯種賊復來劫營掠其輜重遂

與其子孛羅帖木爾相失劉哈刺不花進兵來援大破賊兵獲孛羅歸之復駐汴梁東南青堠十二月調兵進討大敗賊於太康遂圍亳州僞宋主小明王遁十六年三月朝廷差知院脫歡來督兵荅什父子親與劉福通對敵自己至西大戰數合荅什墜馬孛羅扶合上馬先還自持弓矢連發以斃追者夜三鼓步回營中十月移駐陳畱十一月攻取夾河劉福通寨十二月庚申次高柴店偪太康三十里是夜二鼓賊五百餘騎來劫以有備亟遁火而追之比曉督陳力戰自寅至巳壯士緣城入其郭斬首數萬禽僞將軍張敏孫韓等九人斬僞丞相王羅二人太康平遣孛羅告捷京師帝賜勞內殿王其先二世拜河南行省左丞相仍兼知樞密院事守禦汴梁識里木雲南行省左丞孛

元史卷四十五 列傳

三

羅四川行省左丞將校僚屬賞爵有差十七年三月詔朝京師加太尉四川行省左丞相九月取胙城東明長垣三縣十月詔遣知院達里麻失理來援分兵雷澤濮州而達里麻失理爲劉福通所殺達達諸軍皆潰荅什力不能支退住石邨朝廷每疑其玩寇失機使者促戰相踵賊覘知之詐爲荅什通和書遺諸道路使者果獲以進荅什聞之一夕憂憤死十二月庚子也

余闕

余闕字廷心一字天心唐元氏世家河西武威父沙刺藏卜官廬州遂爲廬州人闕少喪父授徒以養母與吳澄弟子張恆游文學日進元統元年賜進士及第授同知泗州事爲政嚴明宿吏皆憚之俄召入應奉翰林文字轉中書

刑部主事以不阿權貴棄官歸尋以修遼金宋三史召復入翰林爲修撰拜監察御史改中書禮部員外郎出爲湖廣左右司郎中會莫徭蠻反右丞沙班當帥師堅不往無敢讓之者闕曰右丞當往受天子命爲方嶽重臣不思執弓矢討賊乃欲自逸邪右丞當往沙班曰郎中語固是如芻餉不足何闕曰右丞第往此不難致也闕下令趣之三日皆集沙班行復以集賢經歷召入遷翰林待制出僉浙東道廉訪司事丁母憂歸廬州盜起河南陷郡縣至正十二年行中書于淮東改宣慰司爲都元帥府治淮西起闕副使僉都元帥府事分兵守安慶於時南北音問隔絕兵食俱乏抵官十日而寇至乃集有司與諸將議屯田戰守計環境築堡砦選精甲外扞而耕稼於中屬縣濞山八社

元史卷四十五 列傳

十四

土壤沃饒悉以爲屯明年春夏大饑人相食乃捐俸爲粥以食之得活者甚眾民失業者數萬咸安集之請于中書得鈔三萬錠以振民升同知副元帥又明年秋大旱爲文祈澆山神三日雨歲以不饑盜方據石蕩湖出兵平之令民取湖魚而輸魚租十五年夏大雨江漲屯田禾半沒城下水湧有物吼聲如雷闕祠以少牢水輒縮秋稼登得糧三萬斛闕度軍有餘力乃浚隄增障隄外環以大防深塹三重南引江水注之環植木爲柵城上四面起飛樓表裏完固俄升都元帥廣西苗軍五萬從元帥阿爾思蘭沿江下抵廬州闕移文謂苗蠻不當使之窺中國詔阿爾思蘭還軍苗軍有暴於境者卽收殺之莫敢犯時羣盜環布四外闕居其中左提右挈屹爲江淮一保障論功拜江淮行

省參政仍守安慶通道於江右商旅四集池州趙普勝帥眾攻城連戰三日敗去未幾又至相拒二旬始退懷寧縣達魯花赤百家奴戰死十七年趙普勝同青軍兩道來攻闕拒戰一月餘賊敗走秋拜淮南行省右丞安慶倚小孤山爲藩蔽命義兵元帥胡伯顏統水軍戍馬十月沔陽陳友諒自上游直擣小孤山伯顏與戰四日夜不勝負趨安慶賊追至山口鎮明日癸亥遂薄城下闕遣兵扼於觀音橋俄饒州祝寇攻西門闕擊斬之其軍乃退乙巳賊乘東門紅旗登城闕簡死士力擊賊復敗去戊申賊并軍攻東西二門又卻之賊恚甚乃樹柵起飛樓庚戌復來攻金鼓聲震地闕分命諸將各以兵扞賊晝夜不得息癸卯賊益生兵來攻丙午普勝軍東門友諒軍西門祝寇軍南門羣

元史卷四十五 列傳

五

盜四面蟻集外無一甲之援西門勢尤急闕身當之徒步提戈爲士卒先仍分麾下將督三門之兵自以孤軍血戰斬首無算而闕亦被十餘創日中城陷火起闕知不可爲引刀自剄墮清水塘中闕妻邪卜氏及子德生女福童皆赴井死同時死者守臣韓建一家被害建方臥疾罵賊不屈賊執之以去不知所終城中民相率登城樓自捐其梯曰寧俱死此誓不從賊焚死者以千計其知名者萬戶李宗可紀守仁陳彬金承宗元帥府都事帖木補化萬戶府經歷段桂芳千戶火失不花新李盧廷玉萬延齡丘晉許元炎奏差兀都蠻百戶黃寅孫安慶推官黃圖倫台經歷楊恆知事余中懷寧尹陳巨濟凡十八人城陷之日至正十八年正月丙午也闕號令嚴信與下同甘苦然稍有違

令卽斬以徇闕嘗病不視事將士皆籲天求以身代闕聞強衣冠而出當出戰矢石亂下如雨士以盾蔽闕闕卻之曰汝輩亦有命何蔽我爲故人爭用命稍暇卽注周易帥諸生謁郡學會講立軍士門外以聽使知尊君親上之義有古良將風風烈或欲挽闕入翰林闕以國步危蹙辭不往其忠國之心益素定也卒時年五十六事聞贈淮南江北等處行省平章追封幽國公諡忠宣議者謂自兵興以來死節之臣闕與褚不花爲第一云闕畱意經術五經皆有傳注爲文有氣魄能達其所欲言詩體尙江左高視鮑謝徐庾以下不論也篆隸亦古雅可傳初闕旣死賊義之求屍塘中具棺斂葬於西門外及明定安慶嘉闕之忠詔立廟於忠節坊命有司歲時致祭云

○原臺闕今以舊傳補

元史卷四十五

列傳

六

董搏霄

弟昂霄

董搏霄字孟起磁州人由國子生辟陝西行臺掾時天大旱從侍御史郭貞讞獄華陰縣有李謀兒累殺商賈于道爲賊十五年至百餘事事覺獄已具賄賂有司謂徒黨未獲五年不決人皆以爲憤搏霄知之以言于貞卽以尸諸市天乃大雨授四川肅政廉訪司知事除涇陽縣尹入爲戶部主事升員外郎拜監察御史又出僉遼東肅政廉訪司事歷江西行省左右司郎中遷浙東宣慰副使其歷官所至往往理冤獄革敝政才譽益著稱于時至正十一年除濟寧路總管奉旨從江浙平章教化進征安豐兵至合肥定林站遇賊大破之時朱皋固始賊復猖獗軍少不足以分討有大山民砦及芍陂屯田軍搏霄皆獎勞而約束

之遂得障蔽朱皋官軍屯朱家寺賊至追殺之乃遣進士程明仲往諭賊中招來者千二百家因悉知其虛實夜縛浮橋于肥水既渡賊始覺賊眾數萬據礮南官軍渡者輒爲其所敗搏霄乃麾騎士別渡淺灘襲賊後賊回東南向與騎士迎敵搏霄忽躍馬渡礮揚言于眾曰賊已敗諸軍皆渡一鼓而擊之賊大敗亟追殺之相藉以死者二十五里遂復安豐十二年有旨命搏霄攻濠州又命移軍援江南遂渡江至湖州德清縣而徽饒賊已陷杭州教化問計搏霄曰賊皆野人見杭州子女玉帛非平日所有必縱掠不爲備宜急攻之今欲退保湖州設使賊乘銳直趨京口則江南不可爲矣教化猶豫未決諸將亦難其行搏霄正色曰江浙相君方面既陷于賊今可取而不取誰任其咎

元史卷四十五 列傳

七

復拔劍顧諸將曰諸君荷國厚恩而臨難苟免今相君在是敢有慢令者斬計乃決遂進兵杭城賊迎敵至鹽橋搏霄麾壯士突前諸軍相繼夾擊凡七戰追殺至清河坊賊奔接待寺塞其門而焚之賊皆死遂復杭州已而餘杭武康德清次第以平搏霄亦受代去徽饒賊復自昱嶺關寇於潛行省乃假搏霄爲參政俾復提兵討之搏霄卽日引兵至臨安新溪是爲入杭要路分兵守之而以大軍進至叫口及虎檻遇賊皆大破之追殺至於潛遂復其縣治既又克復昌化縣及昱嶺關降賊將潘大齋二千人賊又有犯千秋關者搏霄還軍守於潛而賊兵大至焚倚郭廬舍搏霄按軍不動左右請出兵搏霄曰未也遣人執白旗登山望賊約曰賊以我爲怯必少懈伺其有閒則麾所執旗

又伏兵城外皆授以火礮復約曰見旗動礮卽發已而旗動礮發兵乃盡出斬首數千級遂復千秋關未幾賊復攻獨松百丈幽嶺三關搏霄乃先以兵守多溪多溪三關要路也旣又分爲三軍一出獨松一出百丈一出幽嶺然後會兵擣賊巢遂乘勝復安吉七戰而克之賊將以其投降者數百人越數日賊復來窺獨松搏霄卽以兵守苦嶺及黃沙嶺賊帥梅元來降且言復有帥十一人欲降者卽遣偏將余思忠至賊砦諭之賊皆入暗室潛議思忠持火投入室內拔劍語眾曰元帥命我來活汝汝復何議已而火起焚其砦叱賊黨散去而引賊帥來降明日進兵克廣德時斬饒諸賊復犯徽州賊中有道士能作十二里霧搏霄以兵擊之已而妖霧開豁諸伏兵皆起賊大潰亂斬首數

元史卷四十五 列傳

六

萬級禽千餘人獲道士焚其妖書而斬之遂平徽州十四年除水軍都萬戶俄升樞密院判官從丞相脫脫征高郵分戍鹽城興化賊巢在大縱德勝兩湖間凡十有二悉剿平之卽其地築芙蓉砦賊入輒迷故道盡殺之自是不敢復犯賊恃習水渡淮北據安東州搏霄招善水戰者五百人與賊戰安東之大湖大敗之遂復安東十六年剿平北沙廟灣沙浦等砦尋進兵泗州不利賊乘勝東下斷官軍糧道乃回軍屯北沙糧且絕與賊死戰凡七晝夜賊敗走奪賊船七十餘乃得渡淮保泗州時方暑雨湖水溢諸營皆避去而搏霄獨守孤城賊環繞數十重攻之搏霄坐城上遣偏將以騎士由四門突出賊後約曰旗一麾卽還旣而旗動步卒自城中出夾擊之賊大敗然賊猶阻西行之

路乃結陳而往翼以奇兵轉戰數十合軍始得至海寧朝廷嘉其功升同僉淮南行樞密院事搏霄建議於朝曰淮安爲南北襟喉江淮要衝其地一失兩淮皆未易保也救援淮安誠爲急務爲今日計莫若於黃河上下并瀕淮海之地及南自沈陽北抵沂莒贛榆諸州縣布連珠營每三十里設一總砦就三十里中又設一小砦使斥堠烽燧相望而巡邏往來遇賊則并力野戰無事則屯種而食然後進有援退有守此善戰者所以常爲不可勝以待敵之可勝也又海寧一境不通舟楫軍糧惟資陸運而凡瀕淮海之地人民屢經盜賊宐加存撫權令軍人搬運其陸運之方每人行十步三十六人可行一里三百六十人可行一十里三千六百人可行一百里每人負米四斗以夾布囊

元史卷四十五 列傳

九

盛之用印封識人不息肩米不著地排列成行日行五百回計路二十八里輕行一十四里重行一十四里日可運米二百石每運給米一升可供二萬人此百里一日運糧之術也又江淮流移之民并安東海寧沈陽贛陽等州縣俱廢其民壯者旣爲軍老弱無所依歸者宐設置軍民防禦司擇軍官材堪牧守者使居其職而籍其民以屯故地練兵積穀且耕且戰內全山東完固之邦外禦淮海出沒之寇而後恢復可圖也十七年毛貴陷益都般陽等路有旨命搏霄從知樞密院事孛蘭奚討之而濟南又告急搏霄乃提兵援濟南賊眾自南山來攻濟南望之兩山皆赤搏霄按兵城中先以數十騎挑之賊率眾來鬪騎兵少卻至礪上伏兵起遂合戰城中兵又大出夫破之而般陽賊

復約泰安之黨踰南山來襲濟南搏霄列兵城上弗爲動賊夜攻南門獨以矢石禦之黎明乃默開東門放兵出賊後旣曰城上兵皆下大開南門合擊之賊敗走復追殺之賊眾無遺者於是濟南始寧詔就升淮南行樞密院副使兼山東宣慰使都元帥仍賜上尊金帶楮幣名馬以勞之有疾其功者譖於總兵太尉紐的該令搏霄依前詔從孛蘭奚征益都搏霄卽出濟南城屬老且病請以弟昂霄代領其眾朝廷從之授昂霄淮南行樞密院判官未幾有旨命搏霄守河閒之長蘆十八年搏霄以兵北行謂人曰我去濟南必不可保旣而濟南果陷搏霄方駐兵南皮縣之魏家莊適詔使拜搏霄河南行省右丞甫拜命毛貴兵已至而營壘猶未完諸將謂搏霄曰賊至當如何搏霄曰我

元史卷四十五 列傳

三

受命至此當以死報國耳因拔劍督兵以戰而賊眾突至搏霄前摔而問曰汝爲誰搏霄曰我董老爺也眾刺殺之無血惟見有白氣衝天是日昂霄亦死之事聞贈河南行省平章追封魏國公諡忠定昂霄贈禮部尙書追封隴西郡侯諡忠毅搏霄早以儒生起家輒爲能吏會天下大亂復以武功自奮其才略有大過人者而當世用之不能盡其才君子惜之

○原臺闕今以舊傳補

慶童

慶童字明德康里氏祖明里帖木爾大府少卿父幹羅思世祖至元中拜監察御史以忤桑葛被譖籍其家惟金玉帶各一黃金五十兩皆上所賜者乃以公用係官孳畜加之罪帝曰此口腹之事也釋不問後宣慰八番平諸蠻有

功至大閒召拜中書右丞兩世皆封益國公慶童早歲以勳臣子受知仁廟給事內廷遂長宿衛三遷至上都畱守又累出爲江西河南二行省平章入爲太府卿復爲上都畱守出爲遼陽行省平章以寬厚爲政遼人德之至正十年遷平章行省江浙適時承平頗沈湎於宴樂凡遺逸之士舉校官者輒擯斥不用由是不爲物論所與明年盜起汝潁蔓延於江浙江東之饒信徽宣鉛山廣德浙西之常湖建德所在不守慶童分遣僚佐往督師不踰時以次克復旣命長吏按視民數誑誤者悉置不問招來流離俾安故業省治燬於兵則拓其故址而新之役貧民趨工以代振十四年脫脫以太師右丞相統大兵南征一切軍資衣甲器仗穀粟薪橐咸取具於江浙慶童規措有方陸運川

輸千里相屬朝廷賴之明年盜起常之無錫眾議以重兵殲之慶童曰赤子無知迫於苛政故弄兵耳其先諭以禍福盜果投戈解甲請爲良民十六年平江湖州陷義兵元帥方家奴以所部軍屯杭城之北關鉤結黨惡白晝劫掠慶童言於江浙行省丞相達識曰我師無律何以克敵必斬方家奴乃可出師達識乃與慶童入其軍數其罪斬首以徇民大悅繼而苗軍帥楊完者以其軍守杭城達識旣承制授完者江浙行省右丞而完者益驕恣強委禽求娶慶童女慶童初不許時苗軍勢甚張達識強勸其婚慶童不得已與之明年出鎮海寧州距杭百里地瀕海磽瘠居二年盜息民阜在江浙七年涉歷艱險勞績甚著十八年拜江南行臺御史大夫賜以御衣上尊二十年召還乃由

海道趨京師拜中書平章政事俄有譖其子剛僧私通宮人者帝怒殺之慶童因鞅鞅不得志移疾家居日飲酒自遣二十五年拜陝西行省左丞相時李思齊擁兵關中慶童至則御之以禮待之以誠居三年關陝用寧召還京師二十八年七月明兵逼京畿帝與皇太子六宮及宰臣近戚皆北奔而命淮王帖木不花監國慶童爲中書左丞相以輔之八月二日京城破淮王與慶童出齊化門皆被殺

慶童父幹羅思舊史專傳今并入

### 耶速

耶速蒙古人倜儻有能名由宿衛歷尙乘寺提點遷宣政院參議至正十四年河南賊芝麻李據徐州耶速從太師脫脫南征以巨石爲礮晝夜攻之不息賊困不能支耶速

元史卷四十五 列傳

三

又攻破南關外城賊遁走以功除同知中政院事繼又領軍從其父太尉月闊察爾征淮西會賊圍安豐卽往援之渡淮無舟因策馬探水深淺浮而過賊大駭徹圍去進攻濠州有詔班師乃還復從太尉征淮東取盱眙遷淮南行樞密院副使俄同知樞密院事討賊海州大敗之賊走航海襲山東盡有其地耶速計賊必乘勝北侵急引兵還表裏擊之復滕兗二州及費鄒曲阜寧陽泗水五縣賊勢遂衄未幾復秦安州及平陰肥城萊蕪新泰四縣又平安水等五十三寨禽蒲臺賊杜黑兒獻京師東昌賊將北寇道出陵州耶速邀擊於景州斬獲殆盡復阜城縣詔耶速以軍屯單家橋斷賊北路戰於長蘆流矢貫左手不顧轉鬪無前殺賊五百餘奪馬三千匹於是分兵下山寨民爭來

歸拜中書平章改行省淮南繼平雄州蔚州各賊知樞密院事劉哈刺不花所部卒掠懷來雲州欲爲亂耶速以輕騎擊降其眾隸麾下賊陷大寧詔耶速往討遇賊侯家店力戰自昏抵曙散而復合乃遣別騎繞出賊後腹背攻之遂拔大寧禽首賊三十五人磔於都市召入覲賞賚優渥進知樞密院事既而賊雷不花程思忠等陷永平詔耶速出師遂復灤州及遷安縣時遼東郡縣惟永平不被兵儲粟十萬芻橐山積居民殷富賊乘閒竊入增土築城因河爲塹堅守不可下耶速乃外築大營絕其樵采數與賊戰獲其僞帥以下二百餘人平山寨數十又復昌黎撫寧二縣禽雷不花送京師賊急乃乞降於參政徹力帖木爾一作里爲請命於朝詔許之命耶速退師耶速嚴備賊棄城遁

元史卷四十五 列傳

三

亟追至瑞州殺獲萬計賊遂東走金復州詔還京師拜遼陽行省左丞相知行樞密院事撫安池東兵農委以便宜開省於永平總兵如故金復海蓋乾王等賊竝起西侵興中州陰由海道趨永平聞耶速開省乃止耶速亟分兵防其衝突賊乃轉攻大寧爲守將王聚所敗斬其渠魁眾潰皆西走耶速慮賊窺上都卽調右丞忽林台提兵護上都簡精銳自躡賊後賊果寇上都忽林台擊破之賊眾又大潰永平大寧於是始平乃分命官屬勞來安輯其民使什伍相保以事耕種民立石頌其勲德二十四年孛羅帖木爾與右丞相朔思監宦者朴不花有怨遣兵犯闕執二人去耶速遂拜中書左丞相七月孛羅帖木爾畱兵守大同自率兵復向闕京師大震百官從帝城守皇太子統兵迎

於清河命耶速軍昌平而孛羅前鋒已度居庸關至昌平  
耶速一軍皆無鬪志不戰而潰皇太子馳入城尋出奔於  
太原孛羅遂入京城爲中書右丞相二十五年皇太子在  
太原與擴廓謀靖內難承制調甘肅嶺北遼陽陝西諸省  
諸王兵入討孛羅孛羅乃遣御史大夫圖堅帖木爾率兵  
攻上都之附皇太子者且以禦嶺北之兵又調耶速率兵  
南禦擴廓部將竹真貊高之兵耶速軍次良鄉不進謀之  
於眾皆謂孛羅圖危宗社中外同憤遂勒兵歸永平西連  
太原擴廓東連遼陽耶速不花國王軍聲大振孛羅患之  
遣其將同知樞密院事姚伯顏不花以兵往攻軍過通州  
白河水溢不能進駐虹橋築壘以待姚伯顏素輕耶速不  
設備耶速覘知之襲破其軍禽姚伯顏孛羅大恐自將攻

元史卷四十五 列傳

五

耶速至通州大雨三日乃還孛羅先以部將保安不附已  
殺之至是又失姚伯顏二人皆驍將也如失左右手鬱鬱  
無計遂敗伏誅二十七年詔以耶速爲中書右丞相分省  
山東二十八年明兵取山東閏七月耶速與部將哈刺章  
田勝周達等禦於莫州眾敗潰乃盡掠莫州殘民北遁

察罕帖木爾

擴廓

察罕帖木爾字廷瑞系出北庭或云姓李氏曾祖闊闊台  
元初隨大軍收河南遂家潁州之沈丘察罕幼篤學嘗應  
進士舉有時名修眉覆目左頰有三豪怒則豪皆直指居  
嘗慨然有當世之志至正十一年紅巾賊劉福通作亂所  
過殘破不數月江淮諸郡皆陷朝廷徵兵致討訖無成功  
察罕奮義起兵沈丘子弟願從者數百人與信陽羅山人

李思齊合兵同設奇計襲破羅山賊事聞授汝寧府達魯花赤思齊知府事所在義士俱將兵來會得萬人自成一軍屯沈丘數與福通戰輒捷十五年賊由汴南陷鄧許嵩洛諸州察罕轉戰而北遂戍虎牢以遏賊鋒賊北渡孟津焚掠至覃懷河北震動察罕引兵奮擊賊敗走河北遂定朝廷奇其功除中書刑部侍郎苗軍以滎陽叛察罕夜襲俘其眾遂營中牟已而淮右賊眾掠汴西來擣中牟營察罕結陳待之會大風揚沙自率猛士鼓譟出擊其中堅賊披靡棄旗鼓走軍聲益大振十六年加兵部尚書繼而汝穎賊黨李武崔德等西陷陝州遂斷殺函勢欲趨秦晉時平章荅什拔都魯方節制河南軍調察罕及思齊往擊之卽鼓行而西夜拔殺陵立柵交口陝州城阻山帶河賊轉

元史卷四十五 列傳

五

南山粟給食固守攻之猝不下察罕乃焚馬矢營中如炊煙狀賊畏兵眾不敢逼而夜提兵拔靈寶城賊始覺卽棄陝州渡河陷平陸掠安邑蹂晉南鄙察罕追蹙至下陽津溺死者眾相持數月賊宵遁以功加僉河北行樞密院事十七年福通遣其黨毛貴陷膠州倪文俊陷陝州李武陷商州由武關逕趨長安至灞上分掠同華諸州三輔震動陝西省臺來告急察罕卽提兵入潼關長驅而前與賊遇戰輒勝賊黨皆散潰走南山入興元朝廷嘉其復關陝功授陝西行省左丞未幾賊出自巴蜀陷秦隴據鞏昌潛窺鳳翔察罕先分兵守鳳翔而遣諜者誘賊來圍察罕自將鐵騎夜馳二百里比至去城五里分軍張左右翼掩擊城中軍亦出呼聲動天地賊大亂自相踐蹂伏屍百餘里關

中悉定十八年毛貴分道由薊州犯京畿朝廷大恐徵諸道兵入衛詔察罕以兵屯涿州察罕卽畱兵成清湫義谷屯潼關塞南山口以備他盜而自將銳卒赴召是時曹濮賊方分道踰大行焚上黨掠晉冀陷雲中雁門代郡烽火數千里復大掠南還察罕先遣兵伏南山隘自勒重兵屯聞喜絳陽賊果出南山縱伏橫擊賊皆棄輜重走乃分兵屯澤州塞怨子城屯上黨塞吾兒谷屯并州塞井陘口以杜大行諸道河東悉定詔進右丞兼西臺御史中丞同知河南行樞密院事命守關陝晉冀兼撫漢沔荆襄便宜行事察罕益以平定四方爲己任是年福通等陷汴梁迎僞主號召羣盜自巴蜀荆楚江淮齊魯遼西以至甘肅所有兵起察罕命北塞大行南守鞏洛自將中軍軍沔池會河

南行省周全叛附福通棄覃懷入汴合兵攻洛陽察罕令嚴守備別以奇兵出空陽而自將精騎發新安來援賊至城下見堅壁不可犯潛引去追至虎牢塞成皋諸險而還拜陝西行省平章仍同知行樞密院事十九年圖復汴梁以大軍次虎牢先發游騎南道出汴南略歸亳陳蔡北道出汴東戰船浮於河水陸竝下略曹南據黃陵渡乃大發秦兵出函谷過虎牢晉兵出大行踰黃河俱會汴城下首奪其外城諸將環城而壘賊屢戰輒敗夜伏兵城南日遣苗軍跳梁者略城而東賊傾城出追伏起邀擊敗之又令弱卒立柵外城以餌賊賊出爭弱卒佯走薄城西因縱鐵騎突擊悉禽其眾賊益氣阻不敢出八月諜知城中食且盡遣出分掠無復還者乃與諸將各分門而攻至夜將士

賈勇斬關入福通挾僞主韓林兒從數百騎出東門遁獲僞后及羣賊妻子數萬符璽印章寶貨無算保全居民二十萬眾不旬日河南悉定捷聞進河南平章政事兼臺院如故察罕既定河南更以兵分鎮關陝荆襄河洛江淮而重兵屯大行營壘相望數千里日修車船繕兵甲務農積穀謀大舉以復山東時山西晉冀諸地皆察罕所平定而荅什拔都魯之子孛羅帖木爾以兵駐大同陰欲并據晉冀日事兵爭天子屢下詔和解終不聽二十一年察罕謀知山東羣賊自相攻殺濟寧義兵萬戶田豐降於賊與福通黨王士誠據山東乃輿疾自陝抵洛大會諸將議師期發并州兵出井陘遼沁軍出邯鄲澤潞軍出磁州懷衛軍出白馬及汴洛軍水陸俱下而自建大將旗鼓渡孟津踰

元史卷四十五 列傳

三

覃懷鼓行而東復冠州東昌八月師至鹽河遣義子擴廓及諸將以精卒五萬擣東平直抵城下察罕以田豐據山東久軍民素服因遺書招之豐及士誠皆降遂復東平下濟寧時大軍猶未渡河賊眾皆聚濟南常出入齊河禹城相擾察罕先遣奇兵取間道出賊後南略泰安逼益都北徇濟陽章丘中徇瀕海郡邑始自將大軍畢渡進逼濟南城下齊河禹城俱降南道諸將捷亦至再敗益都賊於好石橋濱海郡邑皆聞風送款圍濟南三月城乃下詔拜中書平章政事兼臺院如故遂移兵圍益都環城列營治攻具百道竝進賊悉力拒守復掘重塹築長圍遏南洋河灌城仍命分守要害招集流亡郡縣戶口漸次收復二十二年六月豐士誠陰結賊復圖叛當豐之降也察罕待之不

疑數獨入其帳中及是豐將謀變忽請察罕觀營壘眾謂  
不宜往察罕曰吾推心待人安得人人防之左右請以力  
士從不許惟帶輕騎十人行至豐營遂爲士誠所刺歿於  
盭都先是有白氣如索長五百餘丈起危宿掃大微垣太  
史奏山東當大水帝曰不然山東必失一良將卽馳詔戒  
察罕勿輕舉未至已及於難追贈潁川王諡忠襄食邑沈  
丘所在立祠歲時致祭封其父阿魯溫汝陽王進封梁王  
擴廓舊連帖木爾號本王姓小字保保察罕帖木爾甥也自幼養  
以爲子順帝賜名擴廓帖木爾察罕旣沒復卽軍中拜擴  
廓太尉中書平章政事知樞密院事襲總察罕兵以討賊  
攻圍盭都愈急穴地通道以入至正二十二年十一月拔  
其城執田豐王士誠剖其心以祭察罕縛渠魁陳孫頭等

元史卷四十五 列傳

三

二十餘人獻闕下餘黨皆就誅卽遣關保以兵取莒州山  
東悉平引兵還駐太原孛羅帖木爾復數以兵爭晉冀帝  
雖屢解諭而讐隙日深二十三年御史大夫老的沙與知  
樞密院事圖堅帖木爾得罪於皇太子出奔大同投孛羅  
老的沙者帝母舅以故帝命皇太子寢其事皇太子不從  
帝無如之何傳旨密令孛羅匿之軍中而丞相朔思監宦  
者朴不花皆附皇太子必窮竟其事二十四年朔思監朴  
不花因誣孛羅老的沙謀爲不軌三月帝下詔盡削孛羅  
官奪其兵柄孛羅不受詔遂遣兵逼京師必欲得朔思監  
朴不花乃已帝不得已縛二人與之七月孛羅又與老的  
沙合圖堅兵同犯闕皇太子求援於擴廓擴廓遣部將白  
鎖住以萬騎衛京師駐於龍虎臺與戰不利遂奉皇太子

奔太原李羅旣入朝據相位白鎖住又將二萬騎屯漁陽爲朝廷聲援二十五年擴廓以兵擣大同取之皇太子乃趣擴廓大舉以討逆發丞相耶速兵屯東鄙魏遼齊吳豫幽諸王兵駐西邊而自率擴廓兵取中道抵京師亡何李羅伏誅擴廓從皇太子入覲拜太傅左丞相擴廓功雖高起行閒驟至相位中朝舊臣多忌之者而擴廓久典軍亦不樂在內居兩月卽請南還視師是時中原雖無事而江淮川蜀皆淪陷皇太子累請出督師帝難之乃詔封擴廓河南王俾總天下兵代皇太子出征擴廓分省中官屬之半以自隨用孫翥趙恆等爲謀主二十六年二月自京師還河南欲廬墓以終喪左右咸以爲受命出師不可中止乃復北渡居懷慶又移居彰德初李思齊與察罕同起義

元史卷四十五 列傳

元

師齒位相埒及是擴廓總其兵心不能平張良弼遂首拒命孔興脫列伯等亦皆以功自恃各懷異見請別爲一軍莫肯統屬擴廓乃遣關保虎林赤以兵西攻良弼於鹿臺思齊遂與良弼合兵連不能罷皇太子之奔太原也欲用唐肅宗靈武故事自立擴廓不從及還京師皇后奇氏令擴廓以重兵擁太子入城欲脅帝禪位擴廓知其意比至京城三十里卽畱其軍以數騎入朝由是皇太子心銜之及是屢趣出師江淮擴廓欲遂定思齊等然後南征第遣弟脫因帖木爾及部將完哲貂高以一軍屯濟南防遏南兵而自引軍入關攻思齊等相持經年數百戰莫能決帝又下詔和解之擴廓戕殺詔使廷臣譁言其跋扈有狀帝亦心忌之二十七年八月乃下詔命皇太子親出總天下

兵馬分命擴廓自潼關而東肅清江淮李思齊自鳳翔而西進取川蜀圖魯與張良弼孔興脫列伯等取襄樊王信固守山東信地然詔書雖下皇太子竟不行擴廓亦不肯受分兵之命於是貂高關保等皆叛於擴廓列其罪狀於朝舉兵共攻之皇太子立撫軍院總制天下軍馬專備擴廓以貂高等能倡大義賜號忠義功臣十月詔落擴廓太傅中書左丞相依前河南王凡擴廓所總諸軍在帳前者白鎖住虎林赤領之在河南者李克彝領之在山東者耶速領之在山西者沙藍荅里領之在河北者貂高領之擴廓既受詔卽退軍屯澤州朝廷以擴廓勢孤乃詔圖魯李思齊張良弼孔興脫列伯率兵東向與貂高合攻擴廓二十八年朝命左丞孫景益分省太原關保以兵爲之守擴

元史卷四十五列傳

三

廓憤甚引兵據太原盡殺朝廷所置官於是帝下詔削擴廓爵邑令諸軍四面討之其將士官吏效順者與免本罪惟孫翥趙恆罪在不赦二月擴廓退守平陽關保遂據澤潞二州以與貂高合時明兵已及河南思齊良弼皆遣使詣擴廓告以出師非本心乃解兵大掠西歸七月貂高關保進攻平陽當是時擴廓氣稍沮而關保貂高勢張甚數請戰擴廓不應或師出卽復退一日諜知貂高分軍掠祁縣卽夜出師薄其營掩擊之大敗其眾貂高關保皆就禽朝廷聞之遽罷撫軍院旣而擴廓上疏自陳情悃帝尋亦悔悟下詔滌其前非而明兵已定山東收河洛中原俱不守閏七月帝乃下詔復命擴廓仍前河南王太傅中書左丞相孫翥趙恆竝復舊職以兵從河北南討耶速以兵趨

山東圖魯兵出潼關李思齊兵出七盤金商以圖復汴洛未幾耶速兵潰圖魯思齊兵亦不出擴廓又自平陽退守太原不敢復南向國事已不可爲矣已而明兵迫京城帝北奔大都遂陷明兵自澤州徇山西擴廓遣將禦之戰於韓店明兵大敗會帝自開平命擴廓復大都擴廓乃北出雁門將由保安徑居庸以圖舊京明將徐達常遇春乘虛擣太原擴廓還救部將潛約降於明明兵夜劫營營中驚潰擴廓倉猝以十八騎北走明兵遂西入關思齊以臨洮降明良弼走寧夏爲擴廓所執其弟良臣以慶陽降明既而復輸款於擴廓明兵破誅之於是元臣無復以一旅號召中土者惟擴廓擁兵塞上往來甘肅志圖恢復明遣徐達出西安擣定西擴廓方圍蘭州趨赴之戰於沈兒峪盡

元史卷四十五 列傳

三

亡其眾獨與妻子數人奔和林時順帝崩太子嗣立復任以國事踰年明復遣徐達等將十五萬眾分道出塞取擴廓至嶺北擴廓大敗明兵死者數萬人劉基嘗言於明祖曰擴廓未可輕也至是明祖思其言戒諸將稀復出塞明年擴廓又攻雁門其後從其主徙金山卒於哈刺那海之另庭其妻毛氏亦自經死時北元昭宗即順帝太子宣光五年明洪武八年也初察罕破山東江淮震動明祖遣使通好朝廷因命戶部尙書張昶郎中馬合謀浮海如江東授明祖江西行省平章甫至聞察罕被刺遂不受及擴廓視師河南明祖乃復遣使通好擴廓輒畱使者不遣凡七致書皆不答旣出塞復遣人招諭亦不應取後使李思齊往始至則待以客禮尋使騎士送歸至塞下騎士曰主帥有命

請公畱一物爲別思齊曰吾遠來無所齎騎士曰願得公  
一臂思齊知不免遂斷與之還未幾死明祖以是心敬擴  
廓嘗曰吾不能臣王保保其人奇男子也原稟闕今以邵氏類編補察  
罕傳以舊史及明史參補擴廓附傳

元史卷四十五 列傳

三

元史卷四十五終

儒林一

自女真蹂宋據中原之後廢道德性命之說以辨博長雄爲詞章發揚稱述率皆誕漫叢雜理偏而氣豪許衡獨得伊洛之學於南北未通之日及宋亡之後又有江漢趙氏流傳其書北斆於中國保定劉因關中蕭綱始尊信而表章之兼有姚樞竇默廉希憲諸名流主持於上而後學始畫一然許衡初立國學時所教皆蒙古子弟風氣渾厚人材樸茂故先以小學四書端其趨向未暇如宋胡瑗立湖學之法禮樂刑政兵農漕運河渠等事分門講習以儲經濟之實又未嘗如朱熹議貢舉法使經則通漢唐各儒之說史則兼通鑑綱目大學衍義以明體達用可實見諸行

元史卷四十六

列傳

一

事自是以來沿襲日甚而惟脣腐舌敝於四書之講義以言尊德性則內不出於心得力行以言求實用則不知國計民生爲何物且鄙以爲俗吏之事議禮止於誠敬言樂止於中和不曉史事則謂漢唐下皆霸道不能修詞則謂之玩物喪志以質疑辨難爲躡等以無猷爲爲涵養德性以深中厚貌爲變化氣質甚至治平事業不出於節用愛人一語其能知王道通人情深悉天下之利害而內空淵泉溥博之餘者蓋一代中無一人又況至元平宋之初卽罷科舉以吏爲師經師老宿槁死山林後生晚進靡所矜式冒進取者又闊遠於事情類爲刀筆吏所訕侮所用非所養所養非所用歷朝土風之不振未有如元代者而欲收百年養士之恩於未造不亦難乎今錄國初宋金遺逸

諸儒於前而以制作諸儒傳經諸儒次之其特立獨行自由心得者次於末亦一代得失之林也

趙復

趙復字仁甫德安人太宗七年命皇子闕出帥師伐宋德安以其民嘗逆戰數十萬皆俘戮無遺時楊惟中行中書省軍前姚樞奉詔卽軍中求儒道釋醫卜士凡儒生掛俘籍者輒脫之歸復在其中樞與之言奇之以九族俱殘不欲生因與樞訣樞恐其自裁畱帳中共宿既覺失復所在遽馳馬周號積屍間行及水際則見復被髮徒跣仰天而號欲投水樞曉以布衣未仕徒死無益不如隨吾而北可以傳學教化復強從之先是南北道絕載籍不相通復至燕以所記程朱諸經傳註盡錄付樞燕學徒從遊者常百

元史卷四十六 列傳

二

餘人世祖在潛邸召見問曰我欲取宋卿可導之乎對曰宋父母國也未有引他人以伐父母者世祖悅因不強之仕惟中間復論議始嗜學乃與樞謀建書院祠周子以二程張楊游朱六君子配食選取遺書八千餘卷請復講授其中復作傳道圖而以書曰條列於後別著伊洛發揮標其宗旨又取伊尹顏淵言行作希賢錄示學者求端用力之方樞既退隱蘇門乃卽復傳其學由是許衡郝經劉因皆得其書而尊信之北方知有程朱之學自復始復爲人樂易而耿介雖居燕不忘故土與人交尤篤分誼元好問文名擅一時其南歸也復贈之言以博溺心未喪本爲戒以自修讀易求文王孔子之用心爲勉其愛人以德類若此復家江漢上學者稱之曰江漢先生

金履祥

金履祥字吉父婺州蘭谿人其先本劉氏後避吳越錢武肅王嫌名更爲金氏履祥從曾祖景文當宋建炎紹興閒以孝行著稱履祥事同郡王柏從登何基之門基學於黃榦得朱熹之傳時宋事已不可爲履祥遂絕意進取然未忍一日忘世會襄樊之師日急宋人坐視不救履祥因進牽制擣虛之策請以重兵由海道直趨燕薊則襄樊之師不攻自解且備敘海舶所經凡州郡縣邑下至巨洋別島難易遠近歷歷可據以行宋廷臣莫能用及伯顏師入臨安得其書及圖乃命以宋庫藏及圖籍儀器由海道運燕京其後朱清張瑄獻海漕之策所由海道視履祥圖書咫尺無異然後人服其精識德祐初以迪功郎史館編校起

元史卷四十六 列傳

三

之辭弗就宋將改物所在盜起履祥屏居金華山中兵燹稍息則上下巖谷追逐雲月寄情嘯詠視世故泊如也尤篤於分義有故人子坐事母子分配爲隸不相聞者十年履祥傾貲營購卒贖完之後其子貴履祥終不自言相見勞問而已何基王柏之喪履祥率其同門之士以義制服觀者始知師弟之禮履祥以司馬光作資治通鑑託始戰國而周以前則屬祕書丞劉恕爲外紀不本於經而信百家之說是非頗謬於聖人不足以傳信自帝堯以前不經夫子所定固野而難質夫子因魯史以作春秋王朝列國之事非有策書赴告則魯史不得而書在聖人筆削之外況左氏所記或闕或誣凡此類皆不得以辟經爲辭乃用邵氏皇極經世厯胡氏皇王大紀之例損益折衷一以尙

書爲主下及詩禮春秋旁采舊史諸子表年繫事斷自唐堯以下接於通鑑之前勒爲二十卷名曰通鑑前編而白書其後曰荀悅漢紀之書志在獻替而遭值建安之季王仲淹續經之作疾病而聞江都之亂泫然流涕曰生民厭亂久矣天將啟堯舜之運而吾不與焉命也斯吾述作之微意也夫他所著書曰大學章句疏義三卷論語孟子集註攷證十七卷尙書表註四卷天庥初廉訪使鄭允中上其書於朝履祥居仁山之下學者因稱爲仁山先生其淵源雖出王柏然柏支離桀悍於學實無所得物議不與而履祥踐履實用皆出王柏之上大德中卒至正中賜諡文安王禱爲之撰傳

見王忠文集

許謙

張樞

元史卷四十六 列傳

四

許謙字益之金華人父觥登宋淳祐七年進士第謙生數歲而孤母陶氏口授孝經論語稍長肆力於學年三十始受業金履祥之門履祥語之曰吾儒之學理一而分殊理不患其不一所難者分殊耳聖人之道中而已學當致其辨於分之殊而要其歸於理之一每事每物求夫中者而用之道不外是矣又曰士之爲學若五味之在和醯醬既加則酸鹹頓異子來見我已三日而猶夫人也豈吾之學無以感發子邪謙聞之惕然居數年盡得其所傳之奧讀四書尙書各有叢說若干卷讀詩集傳有名物鈔讀春秋三禮有溫故管窺其觀史有治忽機微做史家年經國緯之法起太皞氏迄宋元祐元年年秋九月尙書左僕射司馬光卒備其世數總其年歲原其興亡著其善惡蓋以爲光

卒則中國之治不可復興以附於左氏續經之義又有自  
省編書之所爲夜必書之其不可書者則不爲也延祐初  
謙居東陽八華山講學隨其材質咸有成就獨不以科舉  
之文授人曰此義利所由分也大德中熒惑入南斗句已  
而行謙以災應在吳越竊深憂之是歲大祲謙貌加瘠或  
問曰豈食不足邪謙曰今公私匱竭道殣相望吾何能獨  
飽廉訪使劉庭直副使趙宏偉皆論薦於朝郡復以遺逸  
應詔鄉闈大比請司文衡皆莫能致後至元三年卒年六  
十有八嘗以白雲山人自號世稱爲白雲先生朝廷賜諡  
文懿先是何基王柏及金履祥歿其學猶未大顯至謙而  
其道益著學者稱金華四先生然何金許三人篤實皆在  
王柏之上江浙行中書省爲請於朝建四賢書院以奉祠

元史卷四十六 列傳

五

事而列於學官其弟子著名者有張樞朱震亨震亨兼長  
於醫別見藝術傳

張樞字子長金華人許謙之弟子也幼居外家潘氏盡讀  
其藏書數萬卷輒通其大意尤長於歷代史書掌故嘗爲  
春秋三傳歸一義三十卷刊定三國志六十五卷林下竊  
議一卷張曲江年譜一卷宋季逸事若干卷詩文曰敝帚  
編若干卷卒於至正八年許謙之歿命其子師事樞至正  
十一年朝廷纂修宋遼金三史丞相脫脫奏擢遺逸之士  
四人以兩院次對之職俾參筆削仍辟樞爲本府長史樞  
力辭不拜後五年申命史臣纂修本朝后妃功臣傳特起  
山林之士五人樞以翰林修撰同知制誥召復不就江西  
大吏奉書幣迎主鄉闈文衡返其幣而卻其請四方士莫

不高其風節其卒也黃潛表其墓

見黃文獻集

吳澄

鄭滌孫陶孫

牟應龍

吳澄字幼清撫州崇仁人宋末鄉貢士嘗舉進士不第至元十三年民初附盜賊所在蜂起樂安鄭松招澄居布水谷乃著孝經章句校定易書詩春秋儀禮及大小戴記侍御史程鉅夫奉詔求賢江南起澄至京師未幾以母老辭歸鉅夫請置澄所著書於國子監以資學者朝廷命有司卽其家錄上元貞初左丞董士選薦澄有道擢應奉翰林文字有司敦勸久之乃至而代者已到官澄卽日南歸未幾除江寧儒學副提舉居三月以疾去至大元年召爲國子監丞先是許衡爲祭酒始以朱子小學等書授弟子久之漸失其舊澄更廣以經義各因其材質反覆訓誘其學

元史卷四十六 列傳

六

誠篤不及衡而淹博過之皇慶元年遷司業用程純公學校奏疏胡文定公六學教法朱文公學校貢舉私議約之爲教法四條一曰經學二曰行實三曰文藝四曰治事未及行澄一夕謝去諸生有不謁告而從之南者俄拜集賢直學士俾乘驛至京師次真州疾作不果行英宗卽位超遷翰林學士先是朝廷集善書者泥金寫浮屠藏經詔澄爲序澄曰佛教所言爲善者升高明爲惡者墮污穢列聖之神上同日月何庸薦拔且國初以來凡寫經追薦不知幾舉若未效是無佛法若已效是誣其祖撰爲文辭不可以示後世會帝崩而止泰定元年初開經筵首命澄與平章政事張珪國子祭酒鄧文原爲講官先是至治末詔作太廟議者習見同堂異室之制乃作十三室未及遷奉而

國有大故有司疑於昭穆之次命集議之澄議曰世祖混一天下悉攷古制而行古者天子七廟廟各有宮太祖居中左三廟爲昭右三廟爲穆昭穆神主各以次遞遷其廟之宮頗如今之中書六部夫省部之設亦做金宋豈以宗廟敘次而不攷古乎有司急於行事竟如舊次云時澄已有去志會修英宗實錄命總其事居數月實錄成未上卽移疾不出中書左丞許師敬奉旨賜宴國史院仍致朝廷勉畱之意宴罷卽出城登舟去中書聞之遣官驛追不及而還詔加資善大夫賜金織文綺二及鈔五千貫澄於易春秋禮記各有纂言而書纂言祇注伏生所傳二十八篇不用東晉梅賾所上僞孔古文尤有卓識又校正老子莊子太玄經樂律及八陳圖郭璞葬書初澄所居草屋數間

元史卷四十六 列傳

七

程鉅夫題曰草廬故學者稱之爲草廬先生晚年作尊德性齋記謂問學之功不本於德性則流於訓詁故或者謂澄學宗陸而異朱然其一生從事著述實於陸學無涉也卒年八十五追封臨川郡公諡文正長子文終同知柳州路總管府事京終翰林院典籍官孫當處元末明初以節義著自有傳又有鄭滌孫者字景歐處州人宋景定閒登進士第知溫州樂清縣累歷宗正丞禮部郎官至元三十年薦至京世祖召見授集賢直學士尋遷侍講學士乞致仕歸田里弟陶孫字景潛亦登宋進士第監西嶽祠先陶孫徵至闕授翰林國史院編修官會纂修國史至宋德祐末年事陶孫曰臣嘗仕宋宋是年亡義不忍書世祖嘉之授應奉翰林文字後出爲江西儒學提舉滌孫兄弟在當

時取號博洽隆福宮太后以其兄弟前朝士製衣親賜人  
以爲異數焉滁孫所著有太易法象通贊周易記玩等書

陶孫有文集若干卷

吳澄舊史在  
列傳今移入

牟應龍字伯成其先蜀人後徙居吳興祖子才仕宋贈光  
祿大夫諡清忠父嘯爲大理少卿應龍當以蔭補京官盡  
讓諸從弟而擢咸淳進士第時賈似道當國謂馬廷鸞曰  
君故與清忠游其孫幸來謁當處以高第應龍拒之不見  
及對策具言上下內外之情不通及國勢危急之狀考官  
不敢寘上第調光州定城尉沿海制置司辟爲屬以疾辭  
宋亡故相畱夢炎事世祖爲吏部尙書以書招之許以館  
職應龍不荅起家教授溧陽州晚以上元縣主簿致仕諸  
經皆有成說惟五經音攷盛行於世又從李心傳游得史

元史卷四十六 列傳

八

學端緒勝國文獻如指諸掌故爲文長於敘事時人多求  
碑版稱曰隆山先生

熊朋來

陸文圭

熊朋來字與可豫章人宋咸淳甲戌登進士第第四人授  
寶慶府僉書判官未及就而宋亡世祖初得江南盡求宋  
之遺士用之而朋來隱處州里授生徒無志利祿久之從  
游日眾名動遐邇廉希憲之子惇爲江西參政事以師禮  
終身稱門人劉宣爲按察使尤加禮會朝廷遣治書侍御  
史王構銓外選於江西於是參政徐珍李世安列薦朋來  
爲閩海提舉儒學官而朝廷以東南儒學之士唯福建廬  
陵最盛特起朋來連爲兩郡教授所至攷古篆籀文字調  
律呂協詩歌以興雅樂制器定辭必則古昔學者化焉旣

滿考以常格調建安縣主簿改福清州判官皆不就自號彭蠡釣叟又號天慵子嘗歎詩樂無傳仿朱子所得趙彥肅家十二詩譜增二十四詩協以律呂俾皆可歌每燕居鼓瑟而歌考槃蒹葭衡門白駒諸詩以自樂嘗著瑟賦二篇學者爭傳誦之門人歸之者日盛旁近舍皆滿至不能容延祐初詔以進士科取士時科舉久廢有司咸不知其典故以不稱明詔爲懼行省官諮於朋來手條程式動中軌轍因以申請四方得遵用之及請爲考試官則曰應試者十八九及吾門不可其後江浙湖廣皆卑詞致禮請爲主文朋來屢往應之及對大廷其所選士居天下三之一焉初朋來以周禮首薦鄉郡而元制周官不與設科治戴記者又眇朋來屢以爲言蓋朋來經學三禮尤深是以當

元史卷四十六 列傳

九

世言禮樂者咸推宗之至治中英宗始采用古禮親御袞冕祠太廟銳意制作翰林學士元明善以朋來薦未及召而卒年七十八所著有瑟譜六卷文集三十卷吳澄銘其墓

陸文圭字子方江陰人幼讀書過目成誦博通經史百家宋咸淳初年十八以春秋中鄉選宋亡隱居城東學者稱之曰牆東先生延祐設科有司強之就試凡一再中鄉舉朝廷數遣使幣聘之以老疾不果行卒年八十有五文圭剛明超邁以奇氣自負於地理攷覈尤詳凡天下郡縣沿革人物土產悉能默記如指諸掌先屬續一日語門人曰以數攷之吾州二十年後必有兵變慘於五代建炎吾死當葬不食之地勿封勿樹使人不知吾墓庶無暴骨之患

其後江陰之亂冢墓盡發人乃服其先知有牆東類彙二十卷融會經傳縱橫變化莫測同里有梁益者字友直其先福州人亦博洽工文自文圭旣卒浙以西稱師表者惟益而已益所著書有三山彙詩緒餘史傳姓氏纂又有詩傳旁通發揮朱熹氏學年五十有六卒

劉因

安熙

劉因字夢吉保定容城人世爲儒家父述刻意問學好長嘯中統初劉肅宣撫眞定辟爲武邑令以疾辭歸年四十未有子因生之夕述夢神人馬載一兒至其家旣覺而生乃名曰駟字夢驥後改今名及字因天資絕人三歲識書日記千百言過日成誦六歲能詩七歲能屬文落筆驚人甫弱冠才器超邁日閱方冊思得如古人者友之作希聖

元史卷四十六 列傳

十

解國子司業硯彌堅教授眞定因從之游同舍生皆不能及初爲經學究訓詁疏釋之說歎曰聖人精義殆不止此及得周程張邵朱呂之書一見能發其微曰我固謂當有是也嘗評其學之所長曰邵至大也周至精也程至正也朱子極其大盡其精而貫之以正也因早喪父事繼母孝有父祖喪未葬投書先友翰林待制楊恕憐而助之始克襄事因性不苟合不妄交接家雖甚貧非其義一介不取里居教授師道尊嚴弟子造其門者隨材器教之皆有成就公卿過保定者聞名來謁多遜避不見嘗愛諸葛孔明靜以修身之語表所居曰靜修不忽木以因學行薦於朝至元十九年有詔徵因擢右贊善初皇太子建學宮中命贊善王恂教近侍子弟恂卒命因繼之未幾以母疾辭歸

明年丁內艱二十八年復召爲集賢學士以疾固辭且上書宰相曰因聞君臣之義無所逃於天地之間因生四十二年未嘗效尺寸之力以報國家養育生成之德而恩命連至因尙敢偃蹇不出以博高尚之名以負國家知遇之恩得罪於聖門中庸之教哉且自幼及長未嘗一日敢爲崖岸卓絕之行未嘗自居於高人隱士之目曷者先儲皇以贊善之命來召卽與使者俱行再奉旨令教學亦卽時應命後以老母中風請還家省視不幸竟遭憂制遂不復出初豈有意於不仕邪今聖天子選用賢良一新時政雖前日隱晦之人亦將出仕況平昔非隱晦者哉又況加以不次之寵處以優崇之地者哉獨是形畱意往命與心違病臥空齋惶恐待罪因素有羸疾自去年喪子憂患之餘

元史卷四十六 列傳

十一

繼以疝瘡今歲七月蒸發舊積腹痛如刺下血不已恐一旦身先朝露遂遣人於容城先人墓側修塋待盡乃聞使者持恩命復至手足不知所措拜命後屈畱使者候病勢稍退卽與俱行乃服療至今百無一效皆使者所目擊不得已請其先發伏望閣下俯加鑒諒曲爲矜全蓋疏遠微賤之臣與帷幄諸公不同其進退似非難處之事惟閣下始終成就之書上朝廷不强致明年卒年四十五無子延祐中贈翰林學士追封容城郡公諡文靖

舊史在列傳今移入

安熙字敬仲真定藁城人祖滔父松皆以學行淑其鄉熙旣承家學及聞保定劉因而向慕之所居相距數百里將造其門而因已歿乃從因門人烏叔備問緒說錄其遺書而還建祠堂以奉四世冠昏喪祭一遵文公禮書其教人

以敬爲本以經術爲先弟子去來常至百人出入閭巷帶規佩矩望而知爲安氏弟子遭時承平不屑仕進家居教授垂數十年四方來學者多所成就旣歿鄉人立祠於臺城之西其門人蘇天爵輯其遺文爲默菴集十卷虞集序之曰使熙得見劉氏廓之以高明厲之以奮發則劉氏之學當益昌大於時矣袁桷表其墓

見滋溪集道園集清容集

蕭剡

韓擇

侯均

同恕

第五居仁

蕭剡字惟斗其先北海人父仕秦中遂爲奉元人剡性至孝少爲府史與上官語不合卽日謝去隱終南山下鑿土室讀書其中三十年一言一動必則古先久之行解相應內外如一兼以博極羣書自三禮六書九數以及諸史靡不研究及門受業者甚眾嘗出遇一婦人失金釵道旁疑

元史卷四十六

列傳

十一

剡拾之剡令隨至門取家釵以償其婦後得所遺釵愧謝還之鄉人有騎馬自城中暮歸者遇盜逐之詭言我蕭維斗也盜驚愕釋去征西兵屯長安大帥一日入未張里里人走避帥諭止之曰汝勿怖聞此有蕭先生者見之卽歸吾非侵擾汝也世祖分藩在秦辟剡與楊恭懿韓擇侍秦邸剡以疾辭授陝西儒學提舉不赴省憲大臣卽其家具宴爲賀使一從史先詣剡舍剡方汲水灌園從史至不知其爲剡也使飲其馬卽應之不拒及冠帶迎賓從史見剡有懼色剡殊不爲意後累授集賢直學士國子司業改集賢侍讀學士皆不赴成宗大德九年夏制若曰蕭維斗山中讀書不求名利皇祖及朕屢召不至豈將命者非其人而不來乎今特命使者前往行省給安車一乘楮幣百匹

挈家偕來倘堅不欲仕可進嘉言一二朕當遣人送還於是行省臺所在敦遣力疾北行會成廟不豫命宰臣以治道爲問武宗至大元年仁宗爲太子博選名儒輔導以右諭德召至京師入覲東宮書酒誥爲獻以朝廷時尙湛飲故也尋以病力請去職人問其故則曰在禮東宮東面師傅西面此禮今可行乎俄除集賢學士國子祭酒依前右諭德復以辭卑居尊爲嫌固辭而歸卒年七十有八賜諡貞敏剴制行甚高難進易退論者謂元初逸民惟剴與劉因二人其教人必基諸禮發爲文辭言近旨遠尤長六書其示學者入門必自小學始關輔之士翕然興起所著有禮說小學標題駁論九州志及勤齋文集行於世奉元韓擇者字從善尤邃三禮學有質問者口講指畫無弗貫

元史卷四十六 列傳

三

穿士大夫游宦過秦中必往見擇世祖嘗召赴京以疾辭其卒也門人爲服緦麻者百餘人又奉元侯均者字伯仁父母蚤亡獨與繼母居賣菜奉養積學四十年羣經百氏無不淹貫每讀書必熟誦乃已嘗言書不干徧讀終於已無益故隨所叩問如取諸篋世咸服其博聞貌嚴氣剛而應接和易用薦起爲太常博士後以上書忤時相意不待報卽歸關中自宋初張載呂大臨以禮爲教至蕭剴韓擇侯均同恕而關學復興其教大旨宗程朱而專精三禮則出其鄉先正之傳云剴之卒也蘇天爵銘其墓

見滋溪文章

同恕字寬甫其先太原人五世祖遷秦中遂爲奉元人祖昇父繼先博學能文廉希憲宣撫陝右辟掌庫鑰家世業儒同居二百口無閒言至元閒朝廷始分六部選名士爲

吏屬關陝以恕貢禮曹辭不行仁宗踐阼卽其家拜國子司業使三召不起陝西行臺侍御史趙世延請卽奉元置魯齋書院以恕領教事學者殆千數延祐設科再主鄉試六年以左贊善召入見東宮賜酒慰問繼而獻書歷陳古誼盡開悟涵養之道明年春英宗繼統以疾歸致和元年拜集賢侍讀學士以老疾辭恕之學長於禮平居盛暑未嘗不冠帶居父喪哀毀幾喪明祭必如事生扁所居曰桀菴與人文雖外無適莫而中有繩尺家無儋石之儲而聚書萬卷時蕭剡居南山下亦以道高當世入城府必主恕家恕自京還家居十三年海內竝稱蕭同後至元二年卒年七十有八制贈翰林直學士封京兆郡侯諡文貞其所著曰桀菴集二十卷弟子第五居仁字士安幼師蕭剡弱冠從恕受學博通經史躬率子弟力農而學徒滿門嘗行田間遇有竊其桑者自引避之鄰人借驟而死償其直不受曰物之數也何以償爲鄉里高其行諡率多化服稱曰靜安先生

杜瑛

杜瑛字文玉其先霸州信安人父時昇金史有傳瑛長七尺美須髯氣貌魁偉金將亡士猶以文辭規進取瑛獨避地河南緱氏山中時兵後文物彫喪瑛搜訪諸書究古今得失中書粘合珪開府彰德瑛赴其聘遂家焉與良田千畝辭不受術者言其所居下有藏金家人欲發視輒止之後來居者果得黃金百斤其不苟取如此歲己未世祖南伐至彰德召見問計瑛從容對曰漢唐以還人君所恃以

爲國者法與兵食三事而已國無法不立人無食不生亂無兵不守今宋皆蔑之殆將亡矣興之在聖主若控襄樊之師委戈下流以擣其背大業可定也帝悅曰儒者中乃有此人乎瑛復勸帝數事以謂事不如此後當如彼帝納之心賢瑛謂可大用命從行以疾弗果中統初詔徵瑛時王文統方用事辭不就左丞張文謙宣撫河北奏爲懷孟彰德大名等路提舉學校官又辭遺執政書略言天子神聖俊乂輻湊言納計用宐用經術取士興先王之禮樂教化以育材正俗立百年不拔之基不當專任刀筆吏從事簿書期會文法末節反出漢唐之下人或勉之仕則曰爲政不能復古因習舊敝不知先王之法爲何事以此求治不亦難乎吾不能苟且隨時將焉用仕於是杜門著書一

不以窮通得喪動其志年七十遺命其子處立處愿曰吾卽死當表吾墓曰緱山杜處士天厓中贈翰林學士追封魏郡公諡文獻所著書曰春秋地理原委十卷語孟旁通八卷皇極引用八卷皇極疑事四卷極學十卷律呂律厓禮樂雜志三十卷文集十卷其於律則究其始研其義長短清濁周徑積實各以類分取經史而折衷其是非其於厓則謂造厓者皆從十一月甲子朔夜半冬至爲厓元獨邵子以爲天開於子取日甲月子星甲辰子爲元會運世之數無朔虛無閏餘率以三百六十爲歲而天地之盈虛百物之消長不能出乎其中矣論閉物開物則曰開於己開於戊五天之中也六地之中也戊己月之中星也又分卦配之紀年金之大定庚寅交小過之初六國朝之甲寅

三月二十有三日寅時交小過之九四多先儒所未發掇其要著於篇云

舊史在隱逸傳今移入

### 張特立

張特立字文舉東明人初名永避金衛紹王諱易今名中泰和進士爲偃師主簿改宣德州司候州多金國戚號難治特立至官俱往謁之有五將軍率家奴劫民羣羊特立命大索閭里遂造將軍家溫言誘之曰將軍宅寧有盜羊者邪聊視之以杜眾口潛使人索其後庭得羊數十遂縛其奴繫獄其子匿他舍捕得之以近族得減死論豪貴由是遵法正大初遷洛陽令時軍旅數起郡縣窘迫東帥紇石烈牙兀台又侮慢儒士會移鎮陝右道經洛陽見特立古樸不禮之遽責令治糗具期三日足後期如軍法縣民

元史卷四十六列傳

夫

素賢特立爭輸於庭帥大奇之旣而拜監察御史首言世宗諸孫不宜幽囚尙書右丞顏盞石魯與細民爭田參知政事徒單兀典詔事近習皆當罷黜執政者忌之會平章白撒犒軍陝西特立又劾其掾不法白撒訴於金哀宗言特立所言事失實哀宗宥之遂歸田里特立通程氏易晚教授諸生東平嚴實每加禮焉歲丙午世祖在潛邸諭曰前監察御史張特立養素丘園易代如一白首通經誨人不倦今年幾七十研究聖經宜錫嘉名以光潛德可特賜號中庸先生且名其讀書之堂曰麗澤癸丑卒年七十五所著有易集說歷年繫事記

舊史在隱逸傳今移入

### 陳庾

陳庾字子京平陽人金末四方兵起隱盧氏山中旋署

教授日與弟子講習問辨來學日眾會中書令耶律鑄奏  
置經籍所於平陽命庾領校讎事世祖徵至六盤山與語  
大悅中統初以宣慰張德輝薦授平陽路提舉學校官進  
德義樹教化勉學戒惰風俗一變其學沈潛貫穿先行後  
言其事親也日暮必盛服與兄弟婦姒序拜堂下問起居  
受訓敕然後退居洛西每值佳辰令節具琴尊約親友奉  
父仲謙升藍輿登女几山歷白馬烏喙諸峯上龍門臨八  
節灘徘徊嵩高少室訪裴司空邵康節遺迹然後歸及遭  
亂離執喪盡禮兵寇相戒無犯其境與元好問李獻卿李  
微楊奐麻革杜仁傑商挺諸人友善早居汴翰林學士趙  
秉文楊雲翼參政楊慥監察御史雷淵劉祖謙爭相薦引  
莫能屈太原李汾者負才使氣一日會相國寺語侵庾庾

元史卷四十六 列傳

七

正色曰漢有董賈唐有杜韓宋有歐蘇皆能上爲國家重  
下爲儒林表我輩幸遭盛明不能以道義勳猷濟世徒以  
文墨小技陵人乎李沮而退坐客大服故其教人也一本  
諸道德仁義臨終猶手書爲學之要九篇以遺子孫嘗有  
馬病腰醫小愈或欲售之庾曰安用誤人爲後鄉里見人  
儉薄輒曰君是不鬻馬陳先生邪嘗暮歸得金釵玉瑤道  
旁求主名三日不得潛瘞其所過樂安誤碎逆旅主人器  
論償不受密緘白金臥所而去見貧乏不能自存孤惻不  
能婚嫁者必資給之一日語兄賡曰吾聞財多害身今喪  
亂若此而吾廩有餘粟藏有餘布不散不止與爲他人守  
孰若分諸鄰里鄉黨乎兄大喜立散之所著書有經史要  
論三十卷三代治本五卷唐編年二十卷澹軒文集三十

卷程文海銘其墓

見雪樓集

儒林二

張璽 孔思晦 趙侃

張璽字達善其先蜀之導江人蜀亡僑寓江左金華王柏得朱熹三傳之學講道上蔡書院璽從而受業焉自六經語孟傳註以及周程張邵之微言朱子所嘗論定者靡不潛心玩索究極根柢久而不懈所學益宏深微密南北士魁能及之世祖至元中行臺中丞吳曼慶聞其名延至江寧學宮中州士大夫皆遣子弟從游或闢私塾迎之其在眞州來學者尤眾遠近翕然尊之稱曰導江先生以大臣薦朝命爲孔顏孟三氏教授著釋奠儀注其序曰禮曰皮弁祭菜示敬道也禮書殘缺釋奠釋菜名義徒存儀文無

元史卷四十六 列傳

六

可攷者唐開元禮彷彿儀禮饋食篇節文爲詳朱文公謂政和新儀差錯獨於開元禮有取申明至於再三竟格不下身歿之後郡邑倣而行之能通其義者尠矣中原文物肇起四方取則舍魯奚適闕里昔羅兵革宮室荆榛蓋三十年牲殺器皿衣服不備勢使然而儀章度數固多可議者象設非古也開元禮猶云設席是無象也高臺巍坐而席地之禮不可見帶劍秦漢冠服之飾也開元禮朝會猶有解劍之席冕服挾劍未之前聞二者之失所從來久矣神位西坐東向戶位也配位東坐西向主人位也自戶禮廢禮家謂自內出者無匹不行自外至者無主不止故立神以配而爲主焉開元以後遷神位南面配位猶故也進顏孟南向參列如浮圖老子宮者孔氏祖庭廣記謂金

大定十四年所行何所稽乎楹間兩階五齋三酒以四代之器爲備物之享也列數瓦缶果爲何說尸尊不就洗禮也登壘爵於牀洗者以尸尊自居犧象不錯諸地主人遂不坐實爵簡亦甚矣幣之未薦置諸神位之左示不敢褻陳之階阼與主人俱升則不嚴矣蓋事由草創未之講也予典教於茲思有以正之乃取朱文公所攷訂自儀禮開元禮而下裒爲一編命學徒肄習且與講說義數使之入耳著心旣知義理之安將不期改而自改併附社稷風雨雷之祀庶幾好禮者有取焉若夫器樂冠服之度則又博采諸家之說從其是者與此篇并藏孔氏俾後來之文獻足徵云壘氣字端重音吐洪亮講說特精詳子弟從之者誦誦如也其及門知名者甚多夾谷之奇楊剛中尤顯卒

元史卷四十六 列傳

九

無子有經說及文集行世吳澄序其書以爲議論正援据博貫窮縱橫儼然新安朱氏之尸祝也至正中眞州守臣以壘及郝經吳澄皆常留儀眞作三賢祠祀焉

孔思晦字明道孔子五十四世孫受業於導江張壘家貧躬耕爲養雖寒暑力學不懈遠近爭聘爲師大德中游京師祭酒耶律有尙欲薦之以母老辭歸居喪勺水不入口者五日至大中舉茂才爲范陽儒學教諭延祐初調靈陽學先是兩縣校官率以廩薄不能守職而思晦儉約自持教養有法比代去學者皆不忍舍之於是孔氏族入相與議思晦適長且賢宐龔封爵奉祠事狀上政府事未決仁宗雅尙儒道一日問孔子裔今幾世龔爵爲誰廷臣對曰未定帝親取孔氏譜牒按之曰以嫡且長者思晦也復奚

疑命襲封衍聖公月俸五百緡賜四品印泰定三年山東廉訪副使王鵬南言襲爵上公而階止四品於格弗稱且失尊崇意明年改賜三品印初廟燬於兵後雖苟完而角樓圍牆及金絲堂皆未備思晦竭力營度以復其舊祭器禮服悉加整飭又以尼山故廟已毀民冒耕祭田且百年思晦復其田里請置尼山書院以列於學官三氏學舊有田三千畝占於豪民子思書院舊有營運錢萬緡歲取子息以供祭祀久之并負其本思晦皆理而復之聖父舊封齊國公思晦言於朝曰宣聖封王而父爵猶公願加褒崇乃詔加封聖父啟聖王聖母王夫人五季時孔末之後方盛欲以偽滅真害宣聖子孫幾盡至是其裔復欲冒稱宣聖後思晦以爲不共戴天遂會族人稽典故斥之既又重

元史卷四十六列傳

三

刻宗譜於石以杜僞冒元統元年卒至正中賜諡文肅子克堅襲封衍聖公至正十五年召爲同知太常禮儀院事拜陝西行臺侍御史遷國子祭酒擢山東廉訪使不赴孫

希學襲衍聖公

自列傳移附

趙侃字和之金章宗時試太常禮樂科中首選由協律郎累官古樂署直長金末南遷校量鐘律獨黃鐘抑而不揚既至汴林鐘復爾雖更鑄尙然嘆曰八音與政通陰陽消長所在中興其不競乎既而金亡嘗會飲市樓樂甫作語所知曰革音很戾卽去果有酬而鬪死者壬辰北渡後隱居鄉里編集祀典樂志辯三十卷曰以備他日之訪求也戊戌衍聖公孔元揚薦於朝攝大樂丞乘傳徧歷四方搜訪前代禮官樂師祭器圖籍故中統以來文物制作郁然

侃有力焉王暉爲作盧龍趙氏家傳

見秋澗集

### 耶律有尙

耶律有尙字伯強遼東丹王十世孫祖父在金世嘗官於東平因家焉有尙受業許衡以誠篤稱高弟子言動必中規矩識與不識莫不服其爲有道之士至元八年衡除集賢大學士兼國子祭酒以教國人之子弟乃奏以門人十二人爲齋長伴讀有尙其一也及衡告歸以有尙爲助教嗣領學事居久之拜監察御史不赴除祕書監丞出知薊州爲政以寬簡得民情皇太子召爲詹事院長史自有尙去而大學事頗廢乃復除國子司業時學館未建師弟子皆寓居民屋有尙屢以爲言二十四年朝廷乃大起學舍始立國子監增廣弟子員於是自有尙遷國子祭酒士風再

元史卷四十六列傳

五

振二十七年以親老辭職歸大德改元復召爲國子祭酒尋除集賢學士兼其職頃之遷太常卿又遷集賢學士八年葬父還鄉里已而朝廷思用老儒以安車召之於家累辭不允復起爲昭文館大學士兼國子祭酒有尙前後五居國學其立教不尙文辭惟以反身窮理爲本致誠力行爲先是以諸生知趨正學崇經術多成德達材之士卒年八十有六諡文正

舊史在列傳今移入

### 楊桓

楊桓字武子兗州人幼警悟讀論語至宰予晝寢章慨然有立志由是終身非疾病未嘗晝寢弱冠爲郡諸生補濟州教授召爲太史院校書郎奉敕撰儀表銘麻日序文辭典雅賜楮幣千五百緡辭不受遷祕書監丞至元三十一

年拜監察御史有得玉璽於木華黎曾孫碩德家者桓辨其文爲秦璽語詳禮志卽爲文述璽始末奉上徽仁裕聖皇后成宗卽位疏上時務二十一事一曰郊祀天地二曰親享太廟備四時之祭三曰先定首相四曰朝見羣臣訪問時政得失五曰詔儒臣以時侍講六曰設大學及州郡學教養生徒七曰行誥命以褒善敘勞八曰異章服以別貴賤九曰正禮儀以肅宮庭十曰定官制以省內外冗員十一曰講究錢穀以裕國用十二曰訪求曉習音律者以協太常雅樂十三曰國子監不可隸集賢院宜正其名十四曰試補六部寺監及府州司縣吏十五曰增內外官吏俸祿十六曰禁父子骨肉奴婢相告訐十七曰定婚姻聘財十八曰罷行用官錢營什一之利十九曰復笞杖以別

元史卷四十六 列傳

三

輕重之罪二十曰郡縣吏自中統前仕宦者宜加優異二十一曰爲治之道宜各從本俗奏入帝嘉納之未幾擢祕書少監預修大一統志秩滿歸克州以貲業悉讓弟楷鄉里稱焉大德三年以國子司業召未赴卒年六十有六桓爲人寬厚篤孝博覽羣籍尤精篆籀著六書統六書沂源書學正韻大抵推明許慎之說皆行於世

自列傳  
移入

贈思

贈思字得之其先大食國人元初內附大父魯坤以材授眞定濟南路監榷課稅使因家眞定父翰直始從儒門先生問學輕財重義不干仕進贈思生九歲日記古經傳千言比弱冠以所業就正於翰林學士承旨王思廉之門由是博極羣籍踐履篤實延祐初詔以科第取士贈思不應

既而侍御史郭思貞翰林學士承旨劉賡參政王士熙交章論薦秦定三年詔以遺逸徵至上都見帝龍虎臺時倒刺沙柄國西域人多附焉贍思獨不往屢使人招致之以養親辭歸天祿三年召爲應奉翰林文字賜對奎章閣進所著帝王心法預修經世大典以論議不合求去命奎章閣侍書學士虞集諭留之贍思堅以母老辭遂賜幣遣之後至元三年拜陝西行臺監察御史卽上封事十條曰法祖宗攬權綱敦宗室禮勳舊惜名器開言路復科舉罷數軍一刑章寬禁網時姦臣變亂成憲贍思所言皆人所不敢言戚里有執政陝西行省者恣爲非道贍思發其罪而按之輒棄職夜遁會有詔勿建問然猶杖其私人及分巡雲南按省臣之不法者其人卽解印去遠藩震悚襄漢流

元史卷四十六

列傳

三

民聚居宋紹熙府故地私開鹽井自相部署往往劫囚徒殺巡卒贍思禽其魁而釋其黨復上言紹熙土饒利厚流戶日增若以其人散還本籍恐爲邊患宜設官府以撫定之詔卽其地置宣撫司三年除僉浙西廉訪司事卽按問都轉運鹽使海道都萬戶行宣政院等官贓罪浙右郡縣無敢爲貪墨者復議以浙右諸僧寺私蔽猾民有所謂道人道民行童者類皆瀆常倫隱徭役使民力日耗契勘嘉興一路爲數已二千七百請勒歸本族俾供王賦朝廷卽著爲令四年改僉浙東廉訪司事以病免歸贍思歷官臺憲所至以理窺澤物爲己任屢平反大獄然未嘗故出人罪以市私恩至正四年除江東廉訪副使十年召爲祕書少監議治河事皆辭疾不赴十一年卒於家年七十有四

追封恆山郡侯諡文孝所著述有四書闕疑五經思問奇  
偶陰陽消息圖老莊精詣鎮陽風土記續東陽志重訂河  
防通議西國圖經西域異人傳金哀宗紀正大諸臣列傳  
審聽要訣及文集三十卷

袁柄

袁柄字伯長慶元人宋同知樞密院事韶之曾孫龍圖閣  
學士燮之從孫也家世文學柄少從王應麟講求制度典  
故之學又學古文於戴表元故精博有根柢舉茂材異等  
爲麗澤書院山長成宗大德初閏復程文海王構薦爲翰  
林國史院檢閱官時初建南郊柄進十議曰天無二日天  
尤不得有二五帝不得謂之天作昊天五帝議祭天歲或  
爲九或爲二作祭天名數議圜丘不見於五經郊不見於

元史卷四十六 列傳

五

周官作圜丘非郊議后土社也作后土卽社議三歲一郊  
非古也作祭天無間歲議燔柴見於古經周官以禋祀爲  
天其義各有旨作燔柴泰壇議祭天之牛角繭粟用牲於  
郊牛二合配而言之增羣祀而合祠非周公之制矣作郊  
不當立從祀議郊質而尊之義也明堂文而親之義也作  
郊明堂禮儀異制議郊用辛魯禮也卜不得常爲辛作郊  
非辛日議北郊不見於三禮尊地而遵北郊鄭玄之說也  
作北郊議禮官推其博多見施行遷應奉翰林文字同知  
制誥兼國史院編修官請購求遼金宋三史遺書歷兩考  
遷待制又再任拜集賢直學士久之移疾去復召入改翰  
林直學士知制誥同修國史至治元年遷侍講學士泰定  
初辭歸柄在詞林朝廷制冊勳臣碑銘多出其手博聞洽

識尤長江左文獻嘗謂張伯雨宋東都典故能以歲紀之南渡以後事能以月舉之所著有易說春秋說清容居士集泰定四年卒年六十一追封陳畱郡公諡文清蘇天爵

銘其墓

見滋溪文稿

### 曹元用

曹元用字子貞世居阿城後徙汶上祖義不仕父宗輔德清縣主簿元用始以鎮江路儒學正考滿游京師翰林承旨閻復於四方士少許可及見元用大奇之薦為翰林國史院編修官即論史院寮屬非材請較試取其優者用之御史臺辟為掾史元用初不習吏事而見事明決吏反師之轉中書省右司掾與清河元明善濟南張養浩號為三傑除應奉翰林文字遷禮部主事時累朝皇后既崩者猶

### 元史卷四十六 列傳

五

以名稱而未有諡號元用言后為天下母豈可直稱其名宜加徽號以彰懿德改尚書省右司都事轉員外郎及尚書省罷退居任城久之齊魯間從學者甚眾延祐六年授太常禮儀院經歷屬英宗躬修祀事銳意禮樂其親祀儀注鹵簿輿服之制率所裁定初太廟九室合饗於一殿仁宗崩無室可耐乃於武宗室前結綵為次英宗在上京召禮官集議元用言古者宗廟有寢有室宜以今室為寢當更營大殿於前為十五室帝嘉其議行之授翰林待制擢直學士至治三年八月鐵失之變賊黨赤斤遽至京師收百司印趣召兩院學士北上元用獨不行曰此非常之變吾寧死不從未幾賊果敗泰定二年授太子贊善轉禮部尚書兼經筵官及大朝會為糾儀官申卷班之令俾以序

退無爭門而出之擾又謂太醫儀鳳教坊等官不當序正班當自爲一列後皆遵行時宰執有欲罷科舉法者又有欲損太廟四時之享止存冬祭者元用皆斥其非三年夏帝以日食地震星變詔議所以弭災者元用謂應天以實不以文修德明政應天之實也宜擯浮費節財用選守令恤貧民嚴禮祀汰佛事止造作以紓民力慎賞罰以示勸懲皆切中時敝又論科舉取士之法當革冒濫嚴攷覈俾得真材之用拜翰林侍講學士兼經筵官預修仁宗英宗兩朝實錄又奉旨纂集甲令爲通制譯唐貞觀政要爲蒙古語書成皆行於時凡大制誥率元用所草天祿二年代祀曲阜孔子廟還以司寇像及代祀記獻帝甚喜值太禧宗禮院副使缺中書奏授元用帝不允曰此人翰林中所

元史卷四十六 列傳

三

不可無者將大用之會卒帝嗟悼賜賻鈔五千緡追封東平郡公諡文獻詩文四十卷號超然集二子偉儀

自列傳移入

儒林三

胡長孺

胡一桂

胡炳文

陳櫟

陳晬

胡長孺字汲仲婺州永康人其先世當唐季自天台來徙宋南渡後以進士科出身者十人持節分符先後相望祖巖起嘉定甲戌進士知福州閩縣事父居仁淳祐丁未進士知台州軍州事皆以文辭政事聞於時長孺少從外舅僑蜀銓試第一與高彭李湜梅應春等號南中八士屢遷福寧州倅會宋亡退棲永康山中至元二十五年詔下求賢有司強起之至京師待詔集賢院既而召見內殿拜集賢修撰與宰相議不合改教授揚州元貞元年移建昌轉

台州路寧海縣主簿大德丁未浙東大祲戊申復無麥民相枕死宣慰同知脫歡察議行振荒之令斂富人錢百五十萬給之至縣以餘錢二十五萬屬長孺貯之乃行旁州長孺察其有乾沒意悉散於民間月再至索其錢長孺奉成案進口錢在是矣脫歡察怒甚然不敢問縣有銅巖惡少年狙伺其閒恆出抄掠長孺僞衣商人服令蒼頭負貨以從陰戒騶卒十人躡其後至巖中禽之俾盡首其黨寘於法夜行無虞羣姬聚浮屠庵誦佛經爲禳祈一姬失其衣適長孺出姬訟之長孺以牟麥寘羣姬合掌中命饒佛誦經如初身自閉日叩齒作集神狀且曰吾使神監之矣盜衣者行數周麥富芽一姬屢問掌視長孺指縛之還所竊衣嘗白事帥府歸吏言有姦事屢問弗服者長孺夜伏

元史卷四十六列傳

七

吏案下佯言有詔出迎之縛姦者置東西楹空縣而出庭無一人姦者相謂曰事至此死亦無承行將自解矣語畢案下吏嚙而出姦者叩頭驚服永嘉民有弟質珠步搖於兄者贖焉兄妻貪之給以亡於盜屢訟不獲直往告長孺長孺曰爾非吾部民也叱之去未幾長孺治他盜令盜誣訟者兄受步搖爲贓逮至辨甚力詰曰爾家故有是何謂誣其人叩頭曰誠有之乃弟所質者趣持至呼其弟示曰非爾家物乎遂還之延祐元年以病辭歸不復仕隱杭之虎林山以終長孺初師青田余學古學古師其同邑王夢松夢松傳龍泉葉味道之學味道則朱熹弟子也

胡一桂字庭芳徽州婺源人父方平從饒州德興沈貴寶受朱熹之易於董夢程嘗著易學啟蒙通釋一桂承其家

學宋景定間年十八領鄉薦試禮部不第退而講學遠近師之號雙湖先生所著書有周易本義纂疏本義啟蒙翼傳朱子詩傳纂疏十七史纂竝行於世其同郡胡炳文字仲虎亦以易名家作易本義通釋而於朱熹所著四書用力尤深與餘千饒魯皆羽翼朱氏傳注鄉塾童蒙戶有其書所居室面南山一峯學者稱雲峯先生炳文嘗用薦署明經書院山長再調蘭溪州學正二人之學皆不如長孺所得之深又有陳櫟者字定宇徽之休寧人著四書發明書傳纂疏禮記集義等書專發明朱氏學延祐初詔以科舉取士櫟不欲就試有司強之鄉闈中選遂不復赴禮部教授於家不出門戶者數十年揭傒斯誌其墓乃與吳澄竝稱然澄於漢唐諸傳說多所旁通而櫟則墨守一家言

元史卷四十六 列傳

五

不容一字出入其於朱氏學亦僅涉其藩而未深入也與胡一桂胡炳文略等又有都昌陳澔者號雲柱行事無攷著禮記集說以便蒙誦明代科舉因禮記無專經師姑用以取士遂從祀闕里

吳師道

吳師道字正傳婺州蘭溪人自羈卯知學卽善記覽工詞章才思溢涌發爲歌詩清麗俊逸弱冠因讀宋儒真德秀遺書幡然有志於爲己之學又從事同郡許謙登至治元年進士第授高郵縣丞明達文法吏不敢欺再調寧國路錄事會歲大旱饑民仰食於官者三十三萬口師道勸富民捐粟三萬七千六百石又言於部使者請官粟四萬石鈔三萬八千四百錠振之人賴以存活遷池州建德縣尹

郡學有田七百畝爲豪民所占師道按其圖籍悉以歸於學建德素少茶而權稅重極言於所司減權額民以不病中書左丞呂思誠侍御史孔思立薦爲國子助教尋遷博士六館諸生人人自以爲得師以禮部郎中致仕終於家所著有易詩書雜說春秋胡傳附辨戰國策校註敬鄉錄及文集二十卷其學亦在王柏之上同郡有王餘慶字叔善仕爲江南行臺監察御史亦以儒學名重當世

韓性

程端禮端學

周仁榮仔肩

孟夢恂

韓性字明善紹興人其先家安陽宋魏忠獻王琦八世孫也高祖左司郎中膺胄扈從南渡家於越性七歲讀書日記萬言九歲通小戴禮作大義文意蒼古老生宿學皆稱異焉及長博綜羣籍文辭博達儁偉變化不測自成一家

元史卷四十六

列傳

完

言延祐初以科舉取士學者多請其程式性告以朱熹學校貢舉私議俾從事根柢以應有司之求性出無輿馬僕御所過負者息肩行者避道巷夫街叟至於童穉廝役咸稱之曰韓先生云憲府嘗舉爲教官不赴暮年愈自韜晦然郡之良二千石往咨訪政事皆心折以去天庥中趙世延以名上聞後十年門人李齊爲南臺監察御史力舉其行義而性已卒矣南臺御史中丞月魯不花嘗學於性爲請於朝賜諡莊節先生其所著有禮記說四卷詩音釋一卷書辨疑一卷郡志八卷文集十二卷當性時慶元有程端禮端學兄弟者端禮字敬叔慶元自宋季皆尊尙陸九淵氏之學端禮獨從史蒙卿游以傳朱熹氏窮理讀書之指學者及門甚眾所著有讀書工程國子監以頒示郡邑

校官爲學者式仕衢州路儒學教授卒端學字時叔通春秋登至治辛酉進士第改國子助教動有師法學者嚴憚遷太常博士卒後以子徐貴贈禮部尙書所著有春秋本義三十卷三傳辨疑二十卷春秋或問十卷

周仁榮者字本心台州臨海人父敬孫宋太學生從金華王柏講學於台之上蔡書院與同郡楊珣陳天瑞車若水黃超然朱致中薛松年等同門嘗著易象占尙書補遺春秋類例仁榮承其家學又師珣天瑞治易禮春秋而工爲文章用薦者署美化書院山長地在處州萬山中人尠知學仁榮舉行鄉飲酒禮士俗爲變後辟江浙行省掾史省臣皆呼以先生泰定初召拜國子博士遷翰林院修撰其所教弟子多名人而泰不華取著鄭元祐僑吳集紀仁榮

元史卷四十六

列傳

三

逸事云仁榮居台州築一室甫落成有友人楊公道輿疾至門曰願假君新宅以死仁榮讓正寢居之妻子咸不然仁榮弗顧未幾楊死箱財二十有八莫有主者楊之弟詣仁榮求分財仁榮不許曰若兄寄死於我意固在是喪事之需悉自己出對眾封籍所貯物遣人至平陽呼其子至悉付與之其篤於親故如此仁榮弟仔肩字本道以春秋登延祐五年進士第終惠州路總管府判官亦以文學名同郡有孟夢恂者字長文黃巖人與仁榮同師事楊珣陳天瑞以薦署本郡學錄至正十三年以設策禦寇掠鄉郡有功授常州路宜興縣判官未受命而卒賜諡號曰康靖先生所著有性理本旨四書辨疑漢唐會要七政疑解及筆海雜錄五十卷此皆浙東之儒傳金華之學不失師傳

者

黃澤

黃澤字楚望蜀之資江人蜀士治經必先古注疏澤於名物度數攷覈精審而義理一宗程朱作易春秋二經解二禮祭祀述略大德中江西行省相臣聞其名授江州景星書院山長使食其祿以施教又爲山長於洪之東湖書院受學者益眾秩滿卽歸閉門授徒以養親不復言仕嘗揭六經中疑義千餘條以示學者令其自思索而得之自言每於幽閒寂寞顛沛流離疾病無聊之際盡悟失傳之旨及其久也則豁然無不貫通於易以明象爲先其機括則盡在十翼作十翼舉要忘象辯象略辨同論於春秋以明書法爲主其大要則在攷覈三傳作三傳義例攷筆削本

元史卷四十六

列傳

五

旨又作元年春王正月辯諸侯娶女立子通攷魯隱公不書卽位義殷周諸侯禘祫周廟太廟單祭合食說作甲辯如是者十餘通以明古今禮俗不同見虛辭說經之無益嘗言學者必悟經旨廢失之由然後聖人本意可見若易象義例與春秋書法大略相似苟通其一則餘可觸類又懼學者道聽耳食不復致思故所著多引而不發乃作易學濫觴春秋指要示人以求端用力之方其於禮學則謂鄭氏深而未完王肅明而實淺作禮經復古正言如王肅混郊丘廢五天帝併崑崙神州爲一趙伯循言王者禘其始祖之所自出以始祖配之而不及羣廟之主胡宏家學不信周禮以社爲祭地之類皆引經以證其非其辯釋諸經要旨則有六經補注詆排百家異議則有翼經罪

言近代經學覃思推澤爲第一吳澄嘗觀其書以爲平生所見明經士未有能及之者然澤雅自慎重未嘗輕與人言李泂使過九江請北面稱弟子受一經且將經紀其家澤謝曰以君之才何經不可明然筆授其義終非心得若余則悟於艱苦之餘吾非邵子不敢以二十年林下期君也泂歎息而去家甚窶貧且年老不復能教授經歲大祿家人采木實草根以療饑晏然曾不動意至正六年卒年八十七門人惟新安趙沔爲高弟傳其春秋之學

#### 儒林四

董朴

董朴字大初順德人自幼強記比冠幡然有求道之志至元十六年用薦起家爲陝西知法官未幾以親老歸養尋

元史卷四十六 列傳

三

召爲太史院主事復辭不赴皇慶初年已踰八十詔以翰林修撰致仕延祐三年無疾而終朴所爲學自六經及孔孟微言與凡先儒所以開端闡幽者莫不研極其旨而會通之故其心所自得往往有融貫之妙其事親孝與人交無智愚貴賤一待以誠或有犯之者夷然不與校中山王結曰朴之學造詣既深充養交至其爲人清而通和而介君子人也所居近龍岡學者因稱之曰龍山先生云

#### 宇文公諒

宇文公諒字子貞其先成都人父挺祖徙吳興公諒弱冠有操行嘉興富民延爲子弟師夜將半聞有叩門者問之乃一婦人聲公諒叱去之翼日卽以他事辭歸終不告以其故至順四年登進士第授徽州路同知婺源州事改同

知餘姚州事夏不雨公諒出禱輒應省檄察實松江海塗田公諒以潮汐不常後必遺患請一概免科省臣從之除國子助教調應奉翰林文字同知制誥兼國史院編修官以病得告改僉嶺南廉訪司事以疾請老公諒平居雖暗室必正衣冠端坐嘗挾手記一冊書有所爲夜必書之其不可書卽不敢爲所著述有折桂集觀光集璧水集以齋詩橐玉堂漫稿越中行稿凡若干卷門人私諡曰純節先生

杜本

杜本字伯原其先居京兆後徙天台又徙臨江之清江博學善屬文江浙行省丞相忽刺木得其救荒策奇之薦於武宗嘗被召至京師未幾歸隱武夷山中文宗在江南時

元史卷四十六 列傳

重

聞其名及卽位以幣徵不起至正三年右丞相脫脫以隱士薦召爲翰林待制兼國史院編修官行至杭州稱疾固辭而致書於丞相曰以萬事合爲一理以萬民合爲一心以千載合爲一日以四海合爲一家則可言制禮作樂而躋五帝三王之盛矣謹誦所聞以備采納何必躬造闕庭哉遂不行本湛靜寡欲無疾言遽色與人交尤篤於義有貧無以養親無貲以爲學者皆濟之天文地理律厯度數靡不通究尤工篆隸所著有四經表義六書通編十原等書學者稱爲清碧先生至正十年卒年七十有五

孫轍

吳定翁

孫轍字履常其先自金陵徙家臨川轍幼孤母蔡氏教之知警策自樹立比長學行純篤事母甚孝家居教授問業

者日盛部使者長吏以下慕其賢者必造焉轍樂易莊敬接之以禮言不及官府憲司屢辟皆不就江西行省特以遺逸舉轍一人吳澄嘗敘其集曰所謂仁義之言藹如也元統二年年七十有三卒於家同郡吳定翁字仲谷其先當宋初自金陵來徙定翁清修文雅與孫轍齊名而取工於詩揭傒斯稱其幽茂疏澹可比盧摯辟薦相望終身不出嘗曰士毋求用於世惟求無愧於世人以爲名言

何中

危復之

何中字大虛撫州樂安人家有藏書手自校讐其學宏深該博廣平程鉅夫清河元明善柳城姚燧東平王構同郡吳澄揭傒斯皆推服之至順二年江西行省平章全岳柱聘爲龍興郡學師明年六月以疾卒所著有易類象二卷

元史卷四十六 列傳

十四

書傳補遺十卷通鑑綱目測海三卷知非堂彙十七卷同郡危復之字見心宋末爲太學生工詩師事湯漢博覽羣書尤好讀易世祖至元閒元帥郭昂屢薦爲儒學官不就朝廷屢遣使以幣徵之皆弗起隱紫霞山中士友私諡曰貞白先生

武恪

武恪字伯威宣德府人初以神童游學江南吳澄爲江西儒學副提舉薦入國學明宗在潛邸選爲說書秀才及出鎮雲南恪在行明宗欲起兵陝西恪諫曰太子北行於國有君命於家有叔父之命今若向京師發一箭史官必書太子反左右惡恪言乃曰武秀才之母在京合遣其回恪遂還京師居陋巷教訓子弟文宗知其名除祕書監典簿

秩滿丁內艱再除中瑞司典簿改汾西縣尹皆不起人或勸之仕恪曰向爲親屈今親已死不復仕矣居數歲會朝廷選守令泰不華舉恪爲平陽沁水縣尹亦不赴近臣又薦爲授經郎恪遂陽爲瘖瘡恪好讀周易每日堅坐與人言學必以敬爲本所著有水雲集若干卷其從之學者如太尉佛家奴樞密完者不花皆有賢名

黃許

陳樵

黃許字與可處州人元季國日陵夷紀綱不振方遣大臣宣撫各道許以括蒼處士謁見獻採時十策曰嚴選舉革貪污除吏敝抑兼并省冗官汰僧道覈田賦興武舉作士氣結人心磊落數千言鑿鑿可見諸行事而大臣暗不能用及豪傑竝起海內分裂中書省參政普顏帖木爾內臺

元史卷四十六

列傳

五

治書侍御史李國鳳奉詔經略江南得許十策嘆曰世未嘗無才顧上無人用才耳欲薦起之則已病矣初許及懷玉鄭元善同里葉峴林定老相師友三人皆第進士而許獨隱居不遇定老僉浙東廉訪司事時舉爲麗水儒學教諭不就中州李彥方持使節至郡見許儀觀甚偉美髯過膝議論慷慨自謂行天下未見如此人竟不仕死識者憾之所著有四書管要讀易大意詩書類要天文地理官制皆有類編及古今人詩文駢儷類選先居石壁山下有石壁晚橐若干卷生平不爲華靡無益之言所居溪堂前直南山學者稱爲南岫先生國子助教貝瓊銘其墓

見清江文集

陳樵字君采東陽人父取青從鄉先生石一鼈游與聞考

亭之學樵承家傳繼受易詩書春秋於程直方書無不讀

讀無不解屏卻傳注獨取遺經精思四十年恍然有得著  
易象數解新說洪範傳經解四書本旨孝經新說常製鹿  
皮爲衣種藥園谷中自稱鹿皮子集

鄭玉

黃昇

鄭玉字子美徽州歙縣人邃於春秋絕意仕進門人受業  
者爲搆師山書院文章不事雕鍛揭侯斯歐陽玄咸稱之  
至正十四年朝廷除玉翰林待制賜御酒名幣浮海徵之  
玉辭疾不起而爲表以進曰名爵者祖宗之所以遺陛下  
使與天下賢者共之待制之職臣非其才不敢受酒與幣  
天下所以奉陛下陛下得以私與人臣拜賜不敢辭也玉  
既不仕家居日以著書爲事所著有周易纂註十七年明  
兵入徽州守將將要致之玉曰吾豈事二姓者邪因被拘

元史卷四十六

列傳

美

囚久之親戚朋友攜具餉之則從容爲之盡歡明日具衣  
冠北面再拜自縊而死其妻聞之亦從死焉

舊史列忠義  
今改入儒林

黃昇字殷士撫州金谿人博學明經善屬文尤長於詩至  
正十七年用左丞相太平奏授淮南行省照磨未行除國  
子助教遷太常博士轉國子博士陞監丞擢翰林待制兼  
國史院編修官二十八年京城既破昇嘆曰我以儒致身  
累蒙國恩今縱無我戮何面目見天下士乎遂赴井而死  
年六十一有詩文傳於世

舊史列忠義  
今改入儒林

顏師聖

顏師聖一名伯顏字宗道哈刺魯氏隸軍籍蒙古萬戶府  
世居開州濮陽縣師聖生三歲常以指畫地或三或六如  
八卦狀長受業宋進士建安黃坦坦曰此子穎悟過人非

諸生可比因命以顏爲氏且名而字之焉至正四年以隱士徵至京師授翰林待制預修金史旣畢辭歸已而復起爲江西廉訪僉事數月以病免及還四方來學者千餘人其學務深造自得不屑詞章而必期實用十八年河南賊蔓延河北師聖言於省臣將結其鄉民什伍自保而賊兵大至乃渡漳北行邦人從者數十萬家至磁與賊遇被執賊知其名誘以富貴師聖怒罵不屈引領受刃與妻子俱死之年六十有四旣死人或剖其腹見其心數孔曰古稱聖人心有七竅此非賢士乎乃納心其腹中覆牆而揜之有司上其事贈僉太常禮儀院事諡文節所著述皆燬於兵

### 吳當

元史卷四十六 列傳

七

吳當字伯尚澄之孫也幼承祖訓精通經史百家言澄旣歿四方從游者悉就當卒業以薦由國子助教歷官翰林直學士至正中江南盜起大臣有言當世居江右習知民俗且其才可任政事者特授江西廉訪使偕兵部尚書黃昭招捕諸郡當以朝廷兵力不給旣受命卽募民兵由浙閩入克復建撫兩郡時參政朵合方駐兵於此忌當屢捷功在己上因構爲飛語謂當與賊通詔解兵柄尋除名先是當平賊功狀自廣東海道未達京師而朵台等公牘先至故朝廷責當左遷及得功狀知其誣復拜江西參政命未下而陳友諒已陷江西當戴黃冠服道士服杜門不出日以著書爲事友諒遣人辟之臥牀不食以死自誓乃昇牀載之送江州拘留一年終不屈歸隱廬陵之谷坪所著

有周禮纂言及學言彙

自列傳  
移入

元史卷四十六

列傳

美

09836

元史卷四十六終

